

類函 百三七



三百三六  
三百四六

1加3  
427  
137








新念圖書

此係明治八年  
八月廿一日  
田中春樹  
君以贈

田中春樹圖書





淵鑑類函卷三百三

人部六十二

贈答

贈答五

**原**詩後漢蔡邕答對元式詩曰伊余有行爰戾茲邦先進博學同類率從濟濟羣彥如雲如龍君子博文貽我德音辭之集矣穆如清風 又答卜元嗣詩曰斌斌碩人貽我以文辱此休辭非余所希敢不酬答賦誦以歸 魏王粲贈蔡子篤詩曰悠悠世路亂離多阻濟岱江衡邈焉異處風流雲散一別如雨 徐幹答劉楨詩曰與子別無幾所經未一旬我思一何篤其愁如三春雖



路在咫尺難涉如九閩陶陶朱夏別草木昌且繁 應  
瑒報趙淑麗詩曰朝雲不歸夕結成陰離羣獨宿永思  
長吟有鳥孤栖哀鳴北林嗟我懷矣感物傷情 繁欽  
贈梅公明詩曰瞻我北園有條者桑邁此春景旣茂且  
長氤氳吐葉柔潤有光黃條蔓衍青鳥來翔日月其邁  
時不可忘公子瞻旃勲名乃彰 程曉贈傅休奕詩曰  
煢煢獨夫寂寂靜處酒不盈觴有不掩俎厥客伊何許  
由巢父厥醴伊何元酒瓠脯 又贈傅休奕詩曰三光  
飛景玉衡代邁龍集甲子四時成歲權輿授代徐陳蕩  
穢元服初嘉萬福咸會赫赫應門嚴嚴朱闕羣后揚揚

庭燎哲哲

邯鄲淳答贈詩曰我受上命來隨臨淄與

君子處曾未盈朞見召本朝駕言趨期羣子重離首命  
于時餞我路隅贈我嘉辭旣受德音敢不答之余惟薄  
德旣局且鄙見養賢侯於今四祀旣庇西伯永誓沒齒  
今也被命義在不俟瞻戀我侯又慕君子行道遲遲體  
逝情止豈無好爵懼不我與聖主受命千載一遇攀龍  
附鳳必在初舉行矣去矣別易會難自強不息人誰獲  
安願子大夫勉簣成山天休方至萬福爾臻 晉張華  
答何劭詩曰良朋貽新詩示我以遊娛穆如灑清風煥  
若春華敷自昔同寮寀於今比園廬衰疾近辱殆庶幾



並懸輿散髮重陰下把

一作抱

杖臨清渠屬耳聽鳴琴

一作

鳴

流目玩儵魚從容養餘日取樂於桑榆

又詩曰駕

言歸外庭放志永棲遲相伴步園疇春草鬱以滋榮觀

雖盈目親友莫與偕悟物增隆思結戀慕同儕援翰屬

新詩永歎有餘懷 又贈摯仲治詩曰君子有逸志棲

遲於一丘仰蔭高林茂俯臨綠水流恬淡養元虛沈精

研聖猷 何劭贈高華詩曰四時更代謝萬物迭卷舒

暮春忽復來和風與節俱俯臨清泉涌仰觀嘉木敷在

昔同班司今者並園墟私願偕黃髮逍遙綜琴書舉爵

茂陰下攜手共躊躕奚用遺形骸忘筌在得魚 潘岳

為賈謐贈陸機詩曰神農更王軒轅承紀畫野離疆爰

封衆子夏殷既襲宗周繼祀綿綿瓜瓞六國互峙疆秦

兼并吞滅四隅子嬰面櫬漢祖應符 一作靈獻微弱在

涅則渝三雄鼎足孫啓南吳南吳伊何僭號稱王大晉

統天仁風遐揚偽孫銜璧奉土歸疆婉婉長離陵江而

翔長離云誰咨爾陸生鶴鳴九臯猶載厥聲况乃海隅

播名上京爰應旌招撫翼紫 一作庭藩岳作鎮輔我京

室旋反桑梓帝弟作弼或云國官 一作清塗攸失吾子

洗然恬淡自逸廊廟惟清俊又是延擢應嘉舉自國而

遷齊轡羣龍光贊納言優游省闈珥筆華軒昔余與子

人部

贈答

贈答



續續東朝脩日朗月攜手逍遙自我一作離羣二周於  
今雖簡其面分著情深子其超矣實慰我心發言為詩  
望俟好音欲崇其高必重其層在南稱柑度北則橙崇  
子鋒穎不頽不崩 陸機答賈謐詩曰先天創物景命  
是膺降及羣后迭毀迭興邈矣終古崇替有徵在漢之  
季皇綱幅裂雄臣騰一作駑義夫赴節釋位揮戈言謀  
王室王室之亂靡邦不泯如彼墜景曾不可振乃眷三  
哲俾乂斯民啓土綏難改物承天天厭霸德黃祚告覺  
獄訟違魏謳歌適晉陳留歸藩我皇登禪庸岷稽顙三  
江改獻惟公太宰光翼二祖誕育洪胄纂戎於魯昔我

逮茲時惟下僚及子棲遲同林異條年殊志比服舛義  
稠遊跨三春情固二秋祇承皇命出納無違往踐藩朝  
來步紫微升降秘閣我服載輝孰云匪懼仰肅明威分  
索則異攜手實難念昔良遊茲焉永歎公之云感貽此  
音翰蔚彼高潔如玉如蘭民之胥好狷狂厲聖儀刑在  
昔予聞子命 又答潘尼詩曰於穆同心如瓊如琳我  
日東徂來餞其琛彼美潘生實綜我心探子玉懷疇爾  
惠音 又贈馮文罷詩曰嗟我人斯戢翼江潭有命集  
止翻飛自南出彼一作幽谷及爾同林雙情交映遺物  
識心 又贈潘尼詩曰水會於海雲翔於天道之所混



孰後孰先及子雖殊同升太元舍彼元冕襲此雲冠遺  
情市朝永志丘園靜猶幽谷動若揮蘭 又贈從兄車  
騎詩曰孤獸思故藪離鳥悲舊林翩翩遊宦子辛苦難  
為心髣髴谷水陽婉變崑山陰營魄懷茲土精爽若飛  
沈 又贈波丘令馮文罷詩曰夙駕出東城送子臨江  
曲密席接同志羽觴飛灑淥登樓望峻阪時逝一何速  
又贈紀士詩曰瓊環俟豐價窈窕不自鬻有美蛾眉  
子惠音清且淑脩姱協姝麗華顏婉如玉 又贈顧彥  
先詩曰清夜不能寐悲風入我軒立影對孤軀哀聲應  
苦言 傅休奕答程曉詩曰奕奕兩儀昭昭太陽四氣

代升三朝受祥濟濟羣后峩峩聖皇元服肇御配天垂  
光伊周作弼王室惟康顯顯兆民蠢蠢戎糴率土克庭  
萬國奉藩皇澤雲行神化風宣六合咸熙遐爾同歡赫  
赫明明天人合和下罔遺滯焦朽斯華矧我良朋如玉  
之嘉穆穆雖雖興頌作歌 又答程曉詩曰羲和運玉  
衡招搖賦朔旬嘉慶彤三朝美德揚初春聖主加元服  
萬國望威神伊周敷元化並世霑天人洪厓歌山岫許  
由嗟水濱 傅咸贈褚武良詩曰爰暨於褚惟晉之楨  
肇振鳳翼羽儀上京聿作喉舌納言紫庭光贊帝道敷  
皇之明方任之重實在江揚乃授旌鉞宣曜威靈悠悠



洪武書目卷三十三  
選萬東夏於征 又贈崔伏二郎詩曰英妙之選二生  
之授顯顯兩城歡德之茂君子所居九夷非陋無狹百  
里而不垂覆人之好我贈我清詩示我周行心與道期  
誠發自忠義形於辭古人辭謹豈不爾思 又答潘尼  
詩并序曰司州秀才潘正叔識通才高以文學溫雅為  
博士余性直而處清論褒貶之任作詩以見規雖褒飾  
之舉非所敢聞而斐粲之辭良可樂也答之雖不足以  
相酬報所謂蓋各言志也詩曰貽我妙文繁春之榮匪  
榮斯尚乃新其聲吉甫作頌有馥其馨實由樊仲其德  
克明授此瓦礫廁彼瑤瓊貺非其喻聞寵若驚 潘尼

答陸士衡詩曰顧茲蓬蔚廁根蘭陂膏澤雖均華不足  
披逮春不茂未秋先萎子濯鱗翼我挫羽儀願言難常  
載合載離昔遊禁闈祇畏夕惕今放丘園縱心夷逸口  
詠新詩日玩文跡予志耕圃爾勤王役慙無琬琰以酬  
尺璧 又贈劉佐詩曰要言將誰苦聊以貽友生念我  
二三賢規我無隱情 又答楊士安詩曰逝將辭儲宮  
棲遲集南畿不悟百里賤徒惜年志衰躊躕顧城闕怨  
戀慕端闈俊德貽妙詩敷藻發清徽媿彼褒崇過感此  
岐路悲 張載贈虞顯度詩曰疇昔協蘭房繡綵在華  
年嘉好結平素分著寮友前謂得終遐日綢繆永周旋



吾子遭不造，遘閔丁憂艱。俾我失良朋，誰與吐話言。一日為三秋，歲况乃三年。離居一何闊，結思如迴川。石崇贈棗腆詩曰：久官無成績，棲遲於徐方。寂寂守空城，悠悠思故鄉。恂恂二三賢，身遠屈龍光。攜手沂泗間，遂登舞雩堂。文藻譬春華，談話由蘭芳。消憂以觴醴，娛耳以名娼。博奕逞妙思，弓矢威邊疆。司馬彪贈山濤詩曰：茗茗倚梧樹，寄生於南岳。上陵青雲霓，下臨千仞谷。處身自孤危，於何託余足。曹攄贈石崇詩曰：涓涓谷中泉，鬱鬱巖下林。泄泄羣翟飛，咬咬春鳥吟。野次何索漠，薄暮愁人心。三軍望衡蓋，歎息有餘音。臨有忘肉味。

對酒不能斟，人言重別離。斯情効於今，劉琨重贈盧諶詩曰：時光不我與，去乎若雲浮。朱實隕勁風，繁英落素秋。狹路傾華蓋，駸駸摧雙翰。何意百鍊剛，化為繞指柔。盧諶重贈劉琨詩曰：璧由識者顯，龍因慶雲翔。茨棘非所憩，翰飛遊高岡。余音非九韶，何以儀鳳皇。新城非芝圃，曷由殖蘭芳。又諶荅劉琨詩曰：隨寶產漢濱，摘此夜光真。不待卞和顯，自為命世珍。棗腆贈石季倫詩曰：深蒙君子眷，雅顧出羣俗。受寶取諸懷，所贈非珠玉。凡我二三子，執手攜玉腕。嘉言從所好，企予結雲漢。望風整輕翮，因虛舉雙翰。朝遊清渠側，日夕登高館。



又答石崇詩曰昔我不造備嘗顛沛后土傾基皇天  
隕蓋少懷蒙昧長無耿介遺訓莫聞出入靡賴我舅敷  
命於彼徐方載詠陟岡言念渭陽乃泝洪流汎身餘腥  
宵寢晨逝曷路之長亦既至止願言以寫爰有石侯作  
鎮東夏寬以撫戎從容柔雅我聞有言居安思危位極  
則遷勢至必移上德無欲貴道不為妙識先覺通夢皇  
義竊覩堂奧欽蹈明規 摯虞答杜育詩曰越有杜生  
既文且哲龍躍潁豫有聲彰澈賴茲三益如琢如切好  
以義結友以文會豈伊在高分定傾蓋其人如玉美彼  
生芻鐘鼓匪樂安用百壺老夫灌灌離羣索居懷戀結

好心焉悵如 歐陽建答棗腆詩曰於鑠我舅明德塞  
遠俾扞東藩在徐之邳載播其惠載揚其威濟寬以猛  
方夏以綏光啓先業增曜重暉咨余冲人艱苦攸離過  
庭無聞頑固匪移實賴茲誨導之軌儀仰遵嘉訓俯蹈  
明規如葛斯蔓如樛斯垂我邁君子仰之彌高巖巖其  
高即之惟溫居盈思冲在貴忘尊縱酒嘉讌自明及昏  
無幽不研靡與不論人樂其量士感其敦 石崇答棗  
腆詩曰言念將別覩物傷情贈爾語言要在遺名唯此  
遺名可以全生 杜育贈摯仲治詩曰之子于歸言秣  
其駒矧乃斯人乃邁乃徂雖非顯甫餞彼百壺雖非張



仲將贈河魚人亦有言貴在同音雖非翻飛曾未異林  
顧戀無枝增其慨心望爾不遐無金玉音 棗據答阮  
德猷詩曰友朋顧之貽我良箴翫之無斃終詠斯音燕  
鼎在舟雖重不沈庶憑嘉謨高迹可尋 宋鮑昭贈顧  
墨曹詩曰昏明易遠離會難揆雲撤泉分西艫東軌  
鮑令暉題書寄行人詩曰自君之出矣臨軒不解顏砧  
杵夜不發高門晝恒關帳中流熠燿庭前華紫蘭物枯  
識節異鴻來知客寒 又寄行人詩曰桂吐兩三枝蘭  
開四五葉是時君不歸春風徒笑妾 齊王儉贈徐孝  
嗣詩曰婉婉遊龍載遊載東靡靡行雲並躍齊蹤無類

不感有來斯雍之子云邁嗟我莫從歲云暮止述職戒  
行崇蘭罷秀孤松獨貞悲風宵遠乘鴈晨征撫物遐想  
念別書情 徐孝嗣答王儉詩曰書帷停月琴袖承飈  
結芳幽谷解珮明椒去德滋永懷德滋深行雲傳想歸  
鴻寄音 王融贈族叔衛軍詩曰台曜澄華鉉岳裁峻  
經天為象麗地作鎮不器其德有斐斯文質超瑚璉才  
逸卿雲搖筆泉瀉動詠靈紛德馨伊何如蘭之宣貞筠  
抽箭潤篁懷山六樂畢該五禮備貫七訓是敷三英有  
粲惟旦惟公惟公惟旦 謝朓在郡呈沈尚書詩曰淮  
陽股肱守高卧猶在茲况復南山曲何異幽棲時高閣



常書掩荒階少諍詞珍簞清夏室輕扇動涼颺夏季沈  
朱實秋藕折輕絲良辰竟何許夙昔夢佳期坐嘯徒可  
積為邦歲已暮 梁簡文帝贈張纘詩曰儀表咸推挹  
牆仞難窺踐既富垂帷學復折波濤辯綺思暖霞飛清  
文煥颺轉朱旗赫容與雕祭紛曜煜波搖白鱧舟風動  
蒼鷹舳九疑勢參差江天相蔽虧三春澧浦葉九月洞  
庭枝洞庭枝婁娜澧浦葉參差芬芳與搖落俱應傷別  
離 沈約訓孔邊通直懷蓬居詩曰閭闔既洞啓龍樓  
亦高闕兩宮集鸞步二闕引通籍伊爾事清塗紛吾供  
賤役 任昉答劉孝綽詩曰閱水既成瀾藏舟遂移壑

彼美洛陽子投我懷秋作久敬類誠言吹噓似嘲謔兼  
稱夏雲盡復陳秋樹索詎慰耄嗟人徒深老夫託 劉  
孝綽答張左西詩曰相思如三月相望非兩宮持此連  
枝樹暫作背飛鴻若人惠思我摛藻蔚雕蟲仙掌方晞  
露靈鳥正轉風方假排虛翮相與北山叢 王僧孺秋  
日愁居答孔主簿詩曰首夏雲物善晝暑旦猶清日華  
隨水泛樹影逐風輕依簾野馬合當戶昔耶生物我一  
無際人鳥不相驚儻遇北山北聊訪喬法卿 又寄何  
記室詩曰思君不得見望望獨長嗟夜風入寒水曉露  
拂秋花何由假日御暫得寄風車 王筠東陽還經嚴



陵灘贈蕭大夫詩曰子陵狗高尚超然獨長往釣石宛如新故態依可想 裴子野答張貞成臯詩曰匈奴時未滅連年被甲兵明君思將帥方聽鼓鞞聲吾生恣逸翮撫劍起徂征非徒慕辛季聊欲逞良平出車旣方軌絕幕且橫行豈伊長纓繫行見黃河清雖令懦夫勇念別猶有情感子盈編贈握玩以為榮跂子振旅凱含毫備勒銘 蕭子雲贈海法師還甌山詩曰真心好丘壑偏悅幽棲人忽聞甌山旅萬里自相親次寥晚霖霽重疊晴雲新秋至蟬鳴柳風高露起塵動子憶山思惆悵惜荷巾 又寒夜直坊憶袁三公詩曰滴滴雨鳴階惜

惜茲夜靜風落宣猷樹寒凋承光屏高帷獨曉垂華燭  
夜空冷所思不相見方知寒漏永 又東郊望春訓王  
建安雋晚遊詩曰金塘綠泉滿上園梨藥落蛺蝶戀殘  
花黃鸝對妖萼芳菲滿郊甸惠氣生蘭薄子家冠蓋里  
我館幽棲郭綠楊垂長溪便橋限清洛相去能幾許一  
水終疎索 柳惲贈吳均詩曰寒雲晦滄洲奔潮溢南  
浦相思白露亭永望秋風渚心知別路長誰謂若燕楚  
關候日遼絕如何附行旅願作野飛鳥飄然自輕舉  
又贈吳均詩曰山桃落晚紅野蕨開初紫雲日自清明  
蘋芷齊蘿靡離念已鬱陶物華復如此 又贈吳均詩



曰遠遊濟伊洛秣馬度清漳邯鄲饒美女艷色含春芳  
 鼓瑟未成曲踏屣復翱翔我本客遊子情愛在淮陽知  
 誰心不樂念舊苦人腸一又贈吳均詩曰秋風度關隴  
 楚客奏歸音颯颯避霜葉離離出塞禽何遜落日贈  
 范雲詩曰緣溝綠草蔓扶援雜花舒輕煙淡柳色重霞  
 掩日餘遙遙長路晚寂寂行人疎又日夕望江贈魚  
 司馬詩曰湓城帶湓水湓水縈如帶日夕望高樓耿耿  
 青雲外城中多宴賞絲竹常繁會管聲已流悅弦聲復  
 悽切歌黛慘如愁舞腰疑欲絕仲秋黃葉下長風正騷  
 屑早鴈出雲歸故燕辭簷別畫悲在異縣夜夢還洛汭

洛汭何悠悠起望登西樓的的帆向浦團團日隱洲誰  
 能一羽化輕舉逐飛浮吳均贈周興嗣詩曰昔賢當  
 路者聲名振華夏朱輪玳瑁車紫鞵連錢馬朝花舞風  
 中夜月窺窗下想君貴易朋居然應見捨又答柳惲  
 詩曰閒房肅已靜落月有餘暉寒蟲隱壁思秋蛾繞燭  
 飛絕雲斷更合離禽去復歸佳人今何在迢遞江之圻  
 一為別鶴弄千里淚沾衣又謝郭臨丞詩曰聞君立  
 名義我亦倦晨征馬在城上蹀劍自腰中鳴白日遼川  
 暗黃塵墮坻驚願君但銜酒深知有素誠又謝聞人  
 侍郎詩曰悵然心不樂萬里向悠悠凌朝憩杜渚薄暮

人部

謝靈運集卷三百三

贈答

十一



遵江洲君住青門上我發霸陵頭相思自有處春風明月樓  
又詣周承不值因贈此詩曰竹枝任風轉蘭心  
逐風卷青雲葉上團白露花中泣聞君入騎疎聊寄錦  
中書一隨平原客寧憶豫章徐  
又遙贈周承詩曰巨  
石亂天崖雜樹鬱參差伯魚留蜀郡長房還葛陂練練  
波中月亭亭雲上枝高岑蔽人者無處得相知  
又周  
承未還重贈詩曰石渠閫無人子雲今何在顧望獨凝  
憂銜杯竟誰待散雪逐吹寒蓬姿浮霜采甘泉無竹花  
鶴雛欲還海  
陳江總遇長安使寄裴尚書詩曰傳聞  
合浦葉還向洛陽飛北風尚嘶馬南冠獨不歸去雲目

徒送離琴手自揮征蓬失處所春草屢芳菲太息關山  
月風塵客子衣  
增唐張說酌崔光祿冬日述懷贈答  
詩曰徐陳嘗並作枝馬亦同時各負當朝譽俱承明主  
私夫君邁前侶觀國騁竒姿山似鳴威鳳泉如出寶龜  
材雄子雲筆學廣仲舒帷紫綬拂三寺朱門臨九達昔  
我含香日連爾縉雲司朝攜蘭省步夕退竹林期中路  
一分手數載來何遲求友還相得羣英復在茲留臺少  
人務方駕遍尋追涉翫懷同賞露芳憶共持迎賓南澗  
飲載妓東郊嬉春郭綠畝秀秋澗白雲滋名畫披人物  
良書討滯疑興來尤不惜歡往迹如遺歲宴罷行樂層



城間所思夜魂燈處厭朝髮鏡前衰忽在崔駟什兼流  
韋孟詞曲高彌寡和主善代為師齊戒觀華玉留連歎  
色絲終慙起予者何足與言詩 張九齡酬王六寒朝  
見貽詩曰賈生流寓日楊子寂寥時在物多相背惟君  
獨見思漁為江上曲雪作郢中詞忽在兼金訊長懷伐  
木詩 崔顥贈輕車詩曰悠悠遠行歸經春涉長道幽  
冀桑始青洛陽蠶欲老憶昨戎馬地別時心草草烽火  
從北來邊城閉常蚤平生少相遇未得展懷抱今日杯  
酒間見君交情好 杜審言贈崔融詩曰十年俱薄宦  
萬里各他方雲天斷書札風土異炎涼太息幽蘭紫勞

歌竒樹黃日疑懷叔度夜似憶真長北使從江左東歸  
在洛陽相逢慰疇昔相對敘存亡草深窮巷敗竹盡故  
園荒稚節君彌固衰顏余自傷人事盈虛改交遊寵辱  
妨雀羅爭去翟鶴氅競尋王思極歡娛至朋情詎可忘  
連騎追佳賞城中及路旁琴樽橫宴席巖沼卧詞場三  
川宿雨霽四月晚花芳復此開懸榻寧唯入後堂興酣  
鷓鴣舞言洽鳳凰翔高選俄遷職嚴程已飭裝撫躬銜  
道義攜手戀輝光玉振先推美金銘舊所防勿嗟離別  
易行役共時康 沈千運贈史脩文詩曰故人隔千里  
會面非別期握手于此地當歡反成悲念離宛如昨俄



已二十暮疇昔皆少年別來髮如絲不道舊姓名相逢  
知是誰曩遊盡騫翥與君仍布衣豈曰無其才命理應  
有時前路漸欲少不覺生涕洟 王昌齡鄭縣宿陶大  
公館贈馮六元二詩曰儒有輕王侯脫略當世務本家  
藍田中非爲漁弋故無何困躬耕且欲馳永路幽居與  
君近出谷同所鶩昨日辭石門五年變秋露雲龍未相  
感干謁亦已屢子爲黃綬羈余忝蓬山顧京門望西岳  
百里見郊樹飛雨祠上來靄然關中暮驅車鄭城宿秉  
燭論往素山月出華陰開此河渚霧清光比故人豁達  
展心晤馮公尚戢翼元子仍跼步拂衣易爲高論迹難

有趣張范善始終吾等豈不慕罷酒當涼風屈伸備冥  
數 王維贈裴迪詩曰不相見不相見來久日日泉水  
頭常憶同攜手攜手本同心復歎忽分襟和憶今如此  
相思深不深 又贈祖三詠詩曰蠨蛸挂虛牖蟋蟀鳴  
前除歲晏涼風至君子復何如高館聞無人離居不可  
道閒門寂已閉落日照秋草雖有近音信千里阻河關  
中復客汝潁去年歸舊山結交二十載不得一日展貧  
病子旣深契闊余不淺仲秋雖未歸暮秋以爲期良會  
詎幾日終自長相思 孟浩然和張明府登鹿門山詩  
曰忽示登高作能寬旅寓情絃歌旣多暇山水思彌清



草得風先動虹因雨後成謬成巴里和非敢應同聲  
李白贈范金卿詩曰君子在清吟不知東走迷離家未  
幾月絡緯鳴中閨桃李君不言攀花願成蹊那能吐芳  
信惠好相招攜我有結綠珍久藏濁水泥時人棄此物  
乃與燕石齊撫拭欲贈之申眉路無梯遼東慚白豕楚  
客羞山雞徒有獻芹心終流泣玉啼祇應自索莫留舌  
示山妻 又酬崔十五見招詩曰爾有鳥跡書相招琴  
溪飲手跡尺素中如天落雲錦讀罷向空笑疑君在我  
前長吟字不滅懷袖且三年 又以詩代書答元丹丘  
曰青鳥海上來今朝發何處口銜雲錦書與我忽飛去

鳥去凌紫煙書留綺窓前開緘方一笑乃是故人傳故  
人深相勗憶我勞心曲離居在咸陽三見秦草綠置書  
雙袂間引領不暫閒長望杳難見浮雲橫遠山 又贈  
從弟南平太守之遙詩曰少年不得意落魄無安居願  
隨任公子欲釣吞舟魚常時飲酒逐風景壯心遂與功  
名疎蘭生谷底人不鋤雲在高山空卷舒漢家天子馳  
駟馬赤車蜀道迎相如天門九重謁聖人龍顏一醉四  
海春彤庭左右呼萬歲拜賀明主收沈淪翰林秉筆回  
英盼麟閣崢嶸誰可見承恩初入銀臺門著書獨在金  
鑾殿龍駒雕鏗白玉鞍象牀綺席黃金盤當時笑我微



謝靈運詩集卷之三  
賤者却來請謁為交歡一朝謝病遊江海疇昔相知幾  
人在前門長揖後門關今日結交明日改愛君山嶽心  
不移隨君雲霧迷所為夢得池塘生春草使我長價登  
樓詩別後遙傳臨海作可見羊何共和之 又贈崔侍  
郎詩曰長劍一杯酒男兒方寸心洛陽因劇孟託宿話  
曾襟但仰山岳秀不知江海深長安復攜手再顧重千  
金君乃軒轅佐余叨翰墨林高風摧秀木驚彈落虛禽  
不取回舟興而來命駕尋扶搖因借便桃李願成陰笑  
吐張儀舌愁為莊舄吟誰憐明月夜腸斷聽秋砧 杜  
甫移居公安敬贈衛大郎詩曰衛侯不易得余病汝知

之雅量涵高遠清襟照等夷平生感意氣少小愛文辭  
河海由來合風雲若有期形容勞宇宙質樸謝軒墀自  
古幽人泣流年壯士悲水煙通徑草秋露接園葵入邑  
豺狼鬪傷弓鳥雀飢白頭供宴語烏几伴棲遲交態遭  
輕薄今朝豁所思 又贈王二十四侍御契四十韻詩  
曰往往雖相見飄飄愧此身不關輕絃冕俱是避風塵  
一別星橋夜三移斗柄春敗亡非赤壁奔走為黃巾子  
去何瀟灑余藏異隱淪書成無過鴈衣故有懸鶉恐懼  
行裝數伶俜卧疾頻曉鶯工迸淚秋月解傷神會面嗟  
薰黑含悽話苦辛接輿還入楚王粲不歸秦錦里殘丹



淵金卷之三十三  
竈花溪得釣綸消中祇自惜晚起索誰親伏柱聞周史  
乘槎似漢臣鷓鴣不易狎龍虎未宜馴客即挂冠至交  
非傾蓋新由來意氣合直取性情真浪跡同生死無心  
恥賤貧偶然存蔗芋幸各對松筠麤飯依他日窮愁怪  
此辰女長裁褐穩男大卷書勻溯口江如練蠶崖雪似  
銀名園當翠巘野棹沒青蘋屢喜王侯宅時邀江海人  
追隨不覺晚欵曲動彌旬但使芝蘭秀何須棟宇鄰山  
陽無俗物鄭驛正留賓出入並鞍馬光輝忝席珍重遊  
先主廟更歷少城闈石境通幽魄琴臺隱絳脣送終惟  
糞土結愛獨荆榛置酒高林下觀碁積水濱區區甘累

跡稍稍息勞筋網結粘圓鯽絲繁煮細蓴長歌敲柳瘦  
小睡凭藤輪農月須知課田家敢忘勤浮生難去食良  
會惜清晨列國兵戈暗今王德教淳要聞除禦猶休作  
畫麒麟洗眼看輕薄虛懷任屈伸莫令膠漆地萬古重  
雷陳 又酬高使君相贈詩曰古寺僧牢落空房客寓  
居故人供祿米鄰舍與園蔬雙樹容聽法三車肯載書  
草元吾豈敢賦或似相如 又短歌行贈王郎司直曰  
王郎酒酣拔劔斫地歌莫哀我能拔爾抑塞磊落之奇  
才豫樟翻風白日動鯨魚跋浪滄溟開且脫劔佩休徘  
徊西得諸侯棹錦水欲向何門跋珠履仲宣樓頭春色

人部

淵金卷之三十三

贈答



深青眼高歌望吾子眼中之人吾老矣 祖詠酬汴州  
李別駕見贈詩曰秋風多客思行旅厭艱辛自洛非才  
子遊梁得主人文章參末議榮賤豈同論歎世同王演  
懷賢憶法真情由恩舊好契託死生親所愧能投贈清  
言益潤身 李頎贈張旭詩曰張公性嗜酒豁達無所  
營皓首窮草隸時稱太湖精露頂據胡牀長叫三五聲  
興來灑素辭揮筆如流星下舍風蕭條寒草滿戶庭問  
家何所有生事但浮萍左手持蟹螯右手執丹經瞪目  
視霄漢不知醉與醒諸賓且方坐旭日臨東城荷葉裹  
江魚白甌貯香粳微祿心不泄放神於八紘時人不識

者即是安期生 司空曙酬張芬有赦後見贈詩曰紫  
鳳朝銜五色書陽春忽布網羅除已將心變寒灰後豈  
料先生腐草餘建水風煙收客淚杜陵花竹蕩郊居勞  
君故有詩相贈欲報瓊瑤恨不如 武元衡奉酬荊州  
嚴司空見寄詩曰金貂再領三公府玉帳連封萬戶侯  
簾捲青山巫峽曉煙開碧樹渚宮秋劉琨坐嘯風清塞  
謝朓裁詩月滿樓白雪調高歌不得美人南國翠蛾愁  
韋應物答劉信州侍郎詩曰瓊樹凌霜雪蔥蒨如芳  
春英賢雖出守本自玉階人宿昔陪郎署出入仰清塵  
孰云俱列郡比德豈爲鄰風雨飄海氣清凉悅心神重



門深夏晝賦詩延衆賓方以歲月舊每蒙君子親繼作  
郡齋什遠貽荆山珍高閑庶務理遊眺景物新朋友亦  
遠集讌酌在佳晨始唱已慙拙將酬益難伸濡毫竟僮  
俛一用寫悃勤 釋皎然酬薛員外誼見戲詩曰方知  
正始作麗掩碧雲詩文彩盈懷袖風規發詠思遺弓逢  
大敵摩壘怯偏師頻有移書讓多慙繼組遲淺才迂且  
拙虛譽喜還疑猶倚披沙鑿長歌向子期 令狐楚奉  
和僕射相公酬忠武李相公見寄詩曰麗藻飛來自相  
庭五文相錯八音清初瞻綺色連霞色又聽金聲繼玉  
聲才出山西文與武歡從塞北弟兼兄白頭老尹三川

上雙和陽春喜復驚 元稹酬竇校書二十韻詩曰鷗  
鷺元相得杯觴每共傳芳遊春爛熳晴望月團圓調笑  
風流劇論文屬對全詠花珠並綴看雪壁常連竹寺荒  
唯好松齋小更憐潛投孟公轄狂乞莫愁錢塵土拋書  
卷槍籌弄酒權今誇齊箭道力鬪抹弓絃但喜深罇滿  
誰憂乏桂燃漸輕身外役渾證飲中禪及我辭雲陞逢  
君仕圃田音徽千里斷魂夢兩情偏足聽猿啼雨深藏  
馬腹鞭官醪半清濁夷饌雜腥羶顧影無依倚甘心守  
靜專那知暮江上俱會落英前欵曲生平在悲涼歲序  
遷鶴方同北渚鴻又過南天麗句慚虛擲沉機懶強牽



粗酬珍重意工拙定相懸 白居易答韋八詩曰麗句  
勞相贈佳音悵有違早知留客待悔不趁花歸春盡綠  
醅老雨多紅萼稀今朝如一醉猶得及芳菲 又宣武  
令狐相公以詩寄贈傳播吳中聊申酬謝曰新詩傳詠  
忽紛紛楚老吳娃耳徧聞盡解呼為好才子不知官是  
上將軍詞人命薄多無位戰將功高少有文謝朓篇章  
韓信鉞一生雙得不如君 又歲暮枉衢州張使君書  
并詩因以長句報之曰兩州彼此意如何官職蹉跎歲  
欲除浮石潭邊停五馬望濤樓上得雙魚萬言舊手才  
難敵五字新題思有餘貧薄詩家無好物反投桃李報

瓊琚 張籍贈王建詩曰白君去後交遊少東野亡來  
篋笥貧賴有白頭王建在眼前猶見詠詩人 崔峒贈  
元秘書曰舊書稍稍出風塵孤客逢秋感此身秦地謬  
為門下客淮陰徒笑市中也聞阮籍尋常醉見說陳  
平不久貧幸有故人茅屋在更將心事問情親 羅隱  
秋日汴州客舍酬友人詩曰梁宋追遊早歲同偶然為  
別事皆空年如流水催何急道似危途動即窮醉舞且  
欣連夜月狂吟還聚一樓風煩君更枉騷人句白鳳靈  
蛇滿篋中 又縣齋秋晚酬友人朱瓚見寄詩曰中秋  
節後捧瓊瑰坐讀行吟數月來只歎雕龍方擅價不知



瀨鯉竟空迴千枝白露陶潛柳百尺黃金郭隗臺惆悵  
報君無玉案水天東望一徘徊 宋王禹偁贈浚儀朱  
學士詩曰潘岳花陰覆杏壇門生叅謁絳紗寬西垣久  
望神仙侶比部休誇父母官兩屐送僧莎逕滑夜碁留  
客竹齋寒何時瀑直來相繼三入承明興漸闌 蘇舜  
欽答宋太祝見贈詩曰窮冬三日雪旅腸迫枯餓不免  
東郭行難效袁安臥我謁故所宜君來無乃左復貺長  
句詩如留萬金貨恣睢莫能名豪橫不可挫怒犇時旁  
出力翥復下墮使人但驚絕欲繼誰敢作况君名家駒  
少小聲已播丈夫氣剛精不必在長大譬如利錐末所

向物已破余資本滯濁旣壯困家禍區區走俗格僅若  
蠶循磨詩枯實零丁文僻又坎坷翹然當路人顧我甚  
涕唾雅意返願交得無自卑浣俛首已內傾撫躬輒私  
賀無以答高誼胷中強搜邏披豁聊短篇安足謂酬和  
莞爾當棄投毋留重吾過 歐陽脩贈杜默詩曰南山  
有鳴鳳其音和且清鳴於有道國出則天下平杜默東  
土秀能吟鳳凰聲作詩幾百篇長歌仍短行攜之入京  
邑欲使衆耳驚來時上師堂再拜辭先生頷首遣  
教以勿驕矜贈之三豪篇而我濫一名杜子來訪我欲  
求相和鳴顧我文字卑未足當豪英豈如子之辭鏗鏗



問鏞笙淫哇俗所樂百鳥徒嚶嚶杜子卷舌去歸衫翩  
以輕京東聚羣盜河北點新兵饑荒與愁苦道路日以  
盈子盍引其吭發聲通下情上聞天子聰次使宰相聽  
何必九苞禽始能瑞堯庭子詩何時作我耳久已傾願  
以白玉琴寓之朱絲繩 又奉答原甫見過寵示之作  
曰不作流水聲行將二十年吾生少賤足憂患憶昔有  
罪初南遷飛帆洞庭入白浪墮淚三峽聽流泉援琴寫  
得入此曲聊以自慰窮山間中間永陽亦如此醉臥幽  
谷聽潺湲自從還朝戀榮祿不覺鬢髮俱凋殘耳衰聽  
重手漸顛自惜指法將誰傳偶欣日色曝書畫試拂塵

埃張斷絃嬌兒癡女遶翁膝爭欲彊翁聊一彈紫微閣  
老適我過愛我指下聲冷然戲君此是伯牙曲自古常  
歎知音難君雖不能琴能得琴意斯為賢自非樂道甘  
寂寞誰肯顧我相留連興闌束帶索馬去却鎖塵匣包  
青氈 又依韻奉酬聖俞二十五兄見贈之作曰與君  
交結遊我最先衆人我少既多難君家常苦貧今為兩  
衰翁髮白面亦皺念君懷中玉不及市上珉珉賤易為  
價玉棄久埋塵惟能吐文章白虹射星辰幸同居京城  
遠不隔重闌朝罷二三公隨我如魚鱗君聞我來喜置  
酒留逡巡不待主人請自脫頭上巾歡情雖漸鮮老意



益相親窮達何足道古來茲理均 又戲答聖俞持燭  
之句詩曰辱君贈我言雖厚聽我酬君意不同病眼自  
憎紅蠟燭何人肯伴白鬚翁花時浪過如春夢酒敵先  
甘伏下風唯有吟哦殊不倦始知文字樂無窮 又奉  
答子履學士見贈之作曰誰言潁水似瀟湘一笑相逢  
樂未央歲晚君尤耐霜雪興闕吾欲返耕桑銅槽旋壓  
清樽美玉塵閒揮白日長豫約詩筒屢來往兩州雞犬  
接封疆 陳造贈仲國美詩曰三閱春光一建瓴依然  
歸棹泊危亭烏迎客子各頭白柳學故人俱眼青曾是  
縱談僵婢僕又成豪飲臥壘瓶明朝小話前溪別分付

溪風管醉醒 又贈趙秀才詩曰平生心事釣漁舟解  
后青衫映白頭肯為功名戲雕虎不留顏面對沙鷗露  
溥青蓋高荷曉風約黃陂小麥秋入眼斜川歸去好此  
身何處不菟裘 徐積贈黃魯直詩曰不見故人彌有  
情一見故人心眼明忘却問君船住處夜來清夢繞西  
城 楊萬里和蕭伯振見贈詩曰愁裏真成日似年懶  
邊覓句此何緣雨荒山谷江西社苔臥曹瞞臺底甄賴  
有珠璣開病眼旋生羽翼欲俱仙車斜韻嶮難為繼聊  
復酬公莫浪傳 又戲贈子仁姪詩曰小阮新來覓句  
忙自攜破硯汲寒江天公念子抄書苦借與朝陽小半



窓 元周權答張渭濱詩曰與子三年別相思日幾迴  
攜琴松下石沽酒隴頭梅驛遠書難寄山深鴈不來渭  
濱千畝竹瞻沂重徘徊 明李夢陽贈四子詩曰綿綿  
遠道積冉冉歲華晏冰霜夕轉嚴星斗夜仍爛蘭釭照  
寒戶旅士懷鄉縣方幸厠鱗翻詎謂各分散岐路忽在  
茲山川復悠緬王子萬人特英論薄煙漢康生千里足  
邁景速流電環瑋欽奉常秀朗推中翰冲標泛光蕙逸  
思凌元鴈所嗟異根株逝矣悲霜霰興言念睽晤佳期  
阻歡宴 又贈沈氏詩曰辭馬鳴故羣羈人戀心知身  
也匪木石孰無懷與思藹藹軒蓋途才捷競先時冥冥

歸林翮爰集非無枝龍蛇悟易訓蟋蟀感唐詩情感辰  
靡延把袂竟河涯贈子金錯刀申子古別離德愛誠匪  
他邁君豈無期 何景明贈李獻吉詩曰東風吹我衣  
白日何杲杲整駕出郭門修塗浩橫潦登山采幽蘭日  
暮不盈抱采之欲何爲遺我平生好豈無艷陽花言子  
好香草丈夫有本性安得不自保寸心苟弗移可以鑒  
穹昊 王維楨寄謝氏詩曰佳人邈難即言在赤霞岑  
高視天宇外長嘯揚哀音前臨滄海波云是桑麻林神  
理悟變化何浮不有沉幽懷自茲釋仙侶相追尋朝騎  
白鹿遊暮采瑤華吟儻遇雲中翰願以遺同心上言結



永好下言保芳馨 李攀龍古意寄德甫二首曰嘉會  
在俛仰良時不可留悲風自遠至大江以悠悠中懷有  
白薜千載爲一投飛龍雙欲乖胡馬羣相求徘徊視四  
海含意各未酬念此平生親從彼浮雲游明月照我牀  
清風感重闈遺言發懷袖彷彿見容輝古歡匪自今游  
子當何依千秋一高唱豈獨知音稀莫言苦行役極晏  
不如歸努力兩黃鸝爲爾故鄉飛 王世貞寄石大理  
拱辰詩曰昔我遊漳河邁子結歡好穆生攜其醴邃古  
恣搜討及乎承明日子壯予亦老朔風吹飛藿倏忽辭  
中道爲合長苦晚爲別長苦蚤蒲柳不待冬引分就枯

槁寄言和氏璧斯世方共寶爲照當有時有光且自葆

又寄俞仲蔚詩曰維昔休明代委運忘悅康山澤饒  
棲遁霄漢富翱翔窮顯無鰥職操志略相當念余與諸  
子攬佩擷竒章弱植不固舍明庭幸見揚恒恐摧剝候  
元露負微芳四兵東南來殺氣被乾綱湖海波蕩潏一  
葦安得航桃李澤通衢塞摘固其常幽蘭秀深谷樵採  
虞見傷人生非磐石焉覩鬢不霜奚必嬰禍羅百年等  
歸藏貽子以不刊勗哉愛景光 又贈彭年黃姬水詩  
曰日余讎夷嶠委跡竄吳中雖無蘭椒臭托佩君子躬  
彭生挾秋實黃友擷春榮參差申微尚婉孌未逮終凱



洪金卷三百三  
風從南來吹我向幽邦親故感此離遵渚餞賓鴻妙辭  
將柔翰燦若雙琮璜揮手驚聲途湛心耽患叢咫尺平  
生好恂悅恨河嵩衆耳迫相求顯者代稱工慨此蓬蒿  
士永謝輪鞅蹤撫壯豈需偕濛汜恐未容何以表殷勤  
江介凋芙蓉矢言要齊軌庶其慰幽悰 又答仲蔚詩  
曰當春彌不懌委薄日紛糶捐脰延遠懷密陰覆曾丘  
忽枉故人書言短旨何修蒼蒼眉間宇盡入雲霞流婉  
戀若崇朝何云隔三秋黃鵠啄元漿稻梁寧見謀雖蒙  
天池泳不忘故匹儔頤輅生食醯愧以嗜相投將爲同  
枝誓良辰去我道庭卉未揚芬欲報不能酬 又答故

人王逢年詩曰在屈龍從蠖乘仲鵠爲鳳言念子淵材  
無慚部史貢講德旣有述得賢能無頌夕吐丞相茵晨  
割大官供驂喬白鹿新祠瀆碧雞重隱大難爲名才多  
不自用遠戍謹鯉械孤臣抱醢甕朝星稷下士汗雨臨  
淄衆赤丸晝瞥起綠沈春恒動敢衰擁篲迎恐乖炙轂  
送願以湖海心托君雲霄夢 又復張幼于詩曰荆璞  
雖自良在閔誰見賞鳴球懸東序匪搏焉爲響托契並  
冲融揚輝何高朗之子鄧林彥髻年吐神爽鸞姿謝雕  
飾蠖伏韜宏養雖爾時所趣居然汰羣獎九域衡押闔  
千齡恣偃仰乃以拙薄姿當君中心往御李匪自華比



陽仍差長樹敵牙頰間抗交雲霞上攜手汎具區所觀  
但泱泱日月馳雙馭乾坤發遙想曷哉愛蘭芬母使淪  
霜莽 又答寄于鱗詩曰何限乾坤事歸來汝自酬振  
衣滄海月搖筆岱雲秋一字堪金石孤城各斗牛報書  
知健在不必淚潛流 又贈于鱗詩曰醉爾春風金屈  
卮忽看山岳坐來移停鞭欲盡幽州色立馬愁聽出塞  
辭我自青雲甘薄宦誰當白雪問相思蒼茫大陸頻回  
首日暮乾坤未可期 俞允文寄于鱗詩曰日夕思君  
子邁會何由期山澤阻且修念隔難克偕未見致歎曲  
亮由心相知相知不相見悠悠使我悲曠若懷古人千

載與我睽古人雖云遠詎令歡愛攜願言結蘭芳卒歲  
永御之來章儻不乏應慰長渴飢 歐大任答黎惟敬  
詩曰魚目混夜光荆玉迷瓦礫溟鯤搏扶搖斥鷃困叢  
棘哲士多苦心微言豈能析黃鍾久不聞大雅竟誰力  
之子振元藻翩翩起南域抗志入雲霄戢羽媚泉石游  
息竹素園結托丘樊客手中握靈蛇至寶固無敵夙昔  
晤清顏幽懷契岑寂贈我錦繡章宛轉琅玕色知君意  
綢繆何以報宵臆思為中洲鴻奮起雲間翼 黎民表  
予吉出京師貽同好諸子詩曰揚旌出三河引領望雙  
闕飲餞傾路岐纓綬盡朝列婉孌貽贈章光輝奪明月



上有慎修塗下有過迴轍懿此同心言念之五情熱昔  
如形與影今為環與珞朽鈍誠已疲提攜俟明哲 王  
世懋答家兄移文乞休見示詩曰明發懷佳人宛在漳  
之湄華槭披清風攄情多素辭歸懷豈不喻要自中所  
私烈士輕千金由來亦徇知明珠羅南海百斛致娥眉  
陽城一為悅膏沐詎辭施含媚意不前徘徊翻見疑蓬  
心苟難虧鸞舉會有時自憐東家女躡步慚令儀拂拭  
充下陳旅進殿諸姬在賤易成退為容當向誰浮沈邴  
生節白首以自期 又奉答于鱗見贈之作曰江上秋  
空度羽翰故人千里問加餐齋紈忽破吳門色郢雪長

飛海國寒句裏青山堪自遠篋中明月傍誰看思君獨  
夜狂歌發轉向交游把辭難 高岱寄懷李師孟水曹  
詩曰君為滄水使予卧白雲林古色青萍劍希聲綠綺  
琴尺書明月夜千里故人心愁絕兵戈滿孤鴻楚塞深  
**原賦**梁邵陵王贈言賦曰張雲麾問望之美作牧南蕃  
維舟江漢留連飲餞發邁有期會面無日依依別袂恨  
恨江干古人贈別以言聊為贈言賦曰昔人有感於知  
已深情投分如斯已矣相知勢利之間實君子之所鄙  
靜言神交之際亦難得而具美豈真鮮其令終曾自聞  
其善始日渝久而益敬蓋惟一入者爾語同志而好合



諒今古之皆然苟託御而自悅徐因芻而請前况英聲  
與茂實乃絕後而先先似臨潭而對鏡若披霧而覩天  
欽愛顧之罔已良佩服之在旃資淑美之上才超羣雄  
而獨峻德既深於萬頃牆有高乎數仞思若神而泉湧  
文如華而玉振伊薄軀之固陋謬攝官於夏汭知美錦  
之難裁處焚絲而易結幸中途而遽止仰旌旆之踟躕  
似德星之東邁類祥雲之西徂亟留連於河渚或終宴  
於城隅賞既延於賓友懽亦洽於僕夫嗟灰琯之易逝  
慨離袂之云促惜日車之不駐恨流影之難續觀善誘  
而不倦餐好音而未足佇浮雲之可寄願無比乎金玉

張纘懷音賦并序曰西平邵陵王以親賢近能作藿  
夏首下走叨竊時命驅傳湘羅久託下風素蒙淑顧及  
塗經鄢郢淹泊累旬君王彈隨珠於千仞乃貽之以麗  
則詩曰懷我好音敢為懷音賦云爾伊宗周之令望巡  
名南而述職襟帶鄭夏之鄉宣條江漢之域服詩書於  
懷袖抱仁義於胃臆總九德以棲身橫四溟而撫翼循  
微躬之末迹謬馳傳於衡嶷由洞庭而左轉指鄴醴而  
為期仰芳塵於夏汭路將近而彌滋棹陵波以遙驚舟  
望浦而倦遲自清光之未覲逾一紀以歷茲敢憑情之  
往昔逢君恩之未遺陪桂苑之良游接蘭臺之高會既



醉酒以飽德亦傾羞而緩帶感平原之愛客傷岐路之  
難留戀西園之餘賞泣南浦之祖舟結煩言於將贈情  
有重乎琳球顧龍門其不見過夏首於西浮申服義之  
未沫長寄言於還郵 陸倕感知已賦贈任昉曰夜申  
旦而不寐獨匡坐而怨咨命僕夫而夙駕指南館而為  
期學窮書府文究辭林既耳聞而存口又目見而登心  
似臨淄之借書類東武之飛翰軫工遲於長卿踰巧速  
於王粲固乃度平子而越孟堅何論孔璋而與公幹或  
欲涉其涯涘求其界畔則浩浩濛濛彪彪泫泫譬長鋏  
於鞘中若龍淵與蜀漢濟濟冠蓋祁祁雋逸有竊風以

味道咸交臂而屈膝或望路以窺門空升堂而入室彼  
春蘭及秋菊尚無絕於衆芳矧重仁與襲義信遼遼兮  
未央言追意而不逮辭欲書而復忘竊仰高而希驥忽  
脂車而秣馬旣一顧之我隆亦東僻之余假似延州之  
如舊同伯喈之倒屣附蒼蠅於驥尾託明鏡於朝光謂  
虛無而為有布籍甚於游揚於是柔條颯其成勁白露  
變而為霜歲忽忽而道盡憂與愛兮未忘聚落莖於虛  
室聽羈雀之枯楊怵鬱悒其誰語獨撫抱而增傷託異  
人以蠲憂賴奇文而愈疾索黃瓊之寄居造安仁之狹  
室車出門其已歡無論銜杯與促膝譬鄒子之吟松故



未寒而能慄徒納壤以作高陋吞舟而爲罔值墨子之  
愛兼逢太丘之道廣陪九萬以齊征激三千而同上識  
公沙於杵曰拔孝相於無名非夫人之爲感孰云感於  
余情指北邙以作誓期鬱鬱於佳城任昉答陸倕感  
知己賦曰原知己之時義故相知之信然乃貪廉之異  
貫奈勇怯之相懸貪在物而成累怯在我而可甄既自  
得於爲御又甘心於執鞭矧相知其如此獨攬涕而潺  
湲雖有望於已知更非謂其知己信偉人之世篤本侯  
服於陸鄉緬風流與道素襲衰衣與繡裳逮伊人而世  
載並三駿而龍光過龍津而一息望鳳條而載翔彼白

玉之雖潔北幽蘭之信芳思在物之取譬非升斛而能  
量匹方峙於東嶽比凝厲於秋霜不一飯以忘過每三  
錢以投渭匪蒙袂之敢嗟豈溝壑之能衣旣蘊藉其有  
餘又澹然而無味得意同乎卷懷違方似乎仗氣類平  
叔而靡雕似子臺而不朴冠衆善而貽操綜羣言而名  
學折高戴於后臺異鄒顏乎董幄探三詩於河間訪九  
師於淮曲術兼口傳之書藝廣鏗鏘之樂時坐睡而懸  
梁裁據梧而錐幄唯忘年之陸子定一遇於班荆余獲  
田蘇之價爾得海上之名信落魄而無產終長勤於短  
生饑虛表於徐步逃責顯於疾行子比我於叔則又方



余於耀卿心照情交流言靡惑萬類聞求千里懸渴言  
象可廢筌蹄自默居非連棟行待舟車冬夜不長夏日  
靡餘肴核非餌絲竹豈娛我未舍駕子已迴輿中飲相  
顧悵然動色邦壤雖殊離會難測存異山陽之居沒非  
要離之側以膠投漆中離婁豈能識 **增**元趙孟頫求  
友賦答袁養直曰思古人之不可見兮心鬱結而不舒  
登高丘而遠望兮獨慨歎乎增虛波洋洋其汎濫兮欲  
濟而無航膏吾車而孤往兮山鬱乎其蒼蒼四顧聞其  
寂寥兮思蹇產而不鑠采衆芳以自娛兮聊假日以愉  
樂寧長洲之芙蓉兮擊大澤之蘭茝擷江蘿之秀穎兮

結秋蘭以為佩世俗方尚同兮余獨異乎今之人謂蘭  
茝為不芳兮蛾眉枉之以善媼衆不可以戶說兮歷年  
歲而邁閔變心以從俗兮而吾又不忍俟朝陽之鳴鳳  
兮企空谷之白駒何駑駘之衆多兮鷓鴣紛其瞿瞿寧  
飢渴以需時兮恥屬饜乎腥腐古道久其弗繼兮吾惕  
焉而此懼何美人之好脩兮獨與余其同心懷余以厚  
德兮遺余以好音世固有同居而不察兮何千里而能  
同亂淞江之滔滔兮涉遠道以相從覲清揚之信美兮  
懷盛年而莫當子濯足於東海兮晞髮乎扶桑吸沆瀣  
以為飲兮餐朝霞以為糧彼列星之粲爛兮抱明月之



夜光駕青雲而高馳兮鳴和鸞之鏘鏘擾蒼龍使挾輶  
兮服白虎以驅不祥願發軔其勿亟兮聊弭節而抑志  
指黃昏以為期兮夫孰遠而弗至亂曰鹿鳴呦呦猶求  
友兮曾謂斯人不如物之知兮獨行無儔吾將與子為  
類兮 楊襄懷君子賦曰繁岑樓之翼翼兮倚層城之  
隩隈敞八窓以軒豁兮仰飛甍之崔嵬面雲山之轟轟  
兮喧江聲之若雷肆瑤席以鄭重兮呈琅玕與瓊瑰誕  
延賓之翠館兮倚吹簫之鳳臺舉羅幃之芙蓉兮盼美  
人而和偕羌素懷而耿耿兮望青鸞之不來謹修容以  
遙睇兮隔雲駟乎徂徠宛清夢之繾綣兮忽中宵以驚

猜步廣庭以夷猶兮瞻牛女而徘徊援猗蘭以寫抱兮  
拂素琴之凝灰希盛年以綢繆兮何參辰之或乖憶黃  
鳥之嚶嚶兮感賓鴻之獨哀炯予心之如璧兮悵遠道  
而悠哉已矣乎燕議詘兮訓狐是哈荃蕙疎兮蔓草盈  
階曷歸去兮剪故山之萊望玉京兮閭闔漫浮雲兮不  
開整羅襪以行于沾白露兮蒼苔仰碧虛之明月庶流  
影於君懷 孫仲宣交友賦曰思往日之離羣兮羌躊  
躇而內顧恐明德其或疢兮執筵尊而求友慕夫子之  
倜儻兮迺狗芳而易臭欲砥礪以錯節兮不自云其寡  
也覽伐木之猷訓兮亦斯言之難舍也朝握荃以同嗅



今夕擗茵以同佩苟銘心而外向兮夫孰為予之所諱  
民生各有匹兮藉良朋以為處歷觀古人之自益兮孰  
熒然而無與使修名遂可孤兮姣何媵之攸侶抱茲意  
以自納兮疑夫子之印許不留真而食信兮察誠惠以  
相探言既吐而無昧兮行矯焉而孰堪寧中道而拾砥  
兮反而置之璵璠鶉鳩之饒舌兮百草萎而秋寒雉秉  
潔以內信兮謂斯物之在原悲舊好之難棄兮紉秋蘭  
以貽子命蹇脩為吾載道兮冀瓊枝之相擬終盤桓而  
不答兮顧濁流於焉下之心繾綣而我猶兮曰子夷然  
而侮之信不穀之中離兮胡他人之邇也所非共而為

共兮指皇天以為正也惟往古而既然兮焉疑之乎今  
谷風陳其恐懼兮暴公乃潛其形苟非哲靈之睿識兮  
又誰庇之以心相夫子之緯繡兮亦適足以自忝何所  
獨無芳草兮爾何視吾之褊將高舉而求合兮周遊乎  
天望瑤臺之逸女兮見處妃之便媢余既解纜而為理  
兮誓纈佩而盟焉攬申椒始以致贈兮中復雜之葳蕤  
情突梯而不眷兮意偃蹇而徒屬羅滿堂之媼人兮曾  
莫與余兮一目度沅湘而東之兮駕飛龍導乎洞庭令  
羲和相余之前驅兮驟豐隆以清余之後塵倚閭闔而  
祈通兮訊下女之姒媵紛總總其離合兮路曼曼其脩



遠叩靈瑣而假宿兮日忽忽其將晚飲余馬於咸池兮  
悔相道之多眩幸年歲之未暮兮戒鸞鳳助余西馳登  
閶丘與縣圃兮濟白水之淪漪溘余遊此春宮兮適巫  
咸之可稽逮高辛尚未先我兮及少康之未有配屏雄  
鳩使不得媒兮諏蔓茝寓之芳桂欣婉孌而首肯兮爰  
假言而申意曰蜉蝣之振兮夕瘁其裳留夷之質兮歲  
以為常願綢繆而無斃兮戒薄俗而自臧彼舍旃以為  
德兮將怛焉而內傷明夏邦謨思友賦曰何繁思之  
糾結兮中悶齎以罔休晝屢餐而調飢兮寧膳餼之匪  
羞夢雜糅以恍惘兮曼旅夜之悠悠息壅翳其煩促兮

心震蕩而若浮氣鬱鬱以填臆兮淚熒熒而漲眸志沈  
抑而慊慊兮魂離散而難收懼顛躓以厄窮兮茲遷逐  
於海陬哀蕪城之卑濕兮古滸廣之所都形子子而窘  
束兮竊滯此其窮途覽芳菲之變化兮恒感物以增愁  
獸求曹而躑躅兮鳥失侶而啁啾矧離索之悽惻兮顧  
寂歷而無儔寥廓落而冥寞兮阻容與以優游極兄弟  
於四海兮偉曠士之微猷人固各有所志兮焉深淺其  
相侔豈不語洽而貌澤兮惟知心之難求慨仲身之多  
類兮得鮑叔而摠幽儕札相感於傾蓋兮或獻紵而縞  
酬仰尼父之禮瑗使兮慕贈處於回由世重陳雷之懿



行兮况以膠漆之相投王貢出以類聚兮慶廉義以為  
疇古固敦斯軌躅兮余於是之敢偷伐木與刺於鳥鳴  
兮谷風以棄予為仇張陳隙以反目兮蕭朱卒泮然其  
相矛悲夫人之昧昧兮胡纖介而成詆喟斷金之日遠  
兮懼麗澤之皆流時矯首以遙望兮眇雲木之相膠負  
山川之蔽虧兮邈傳置之迴修月輝輝而照夜兮霜稜  
稜以驚秋風蕭蕭而振樹兮雨汨汨以沈丘情縹緲以  
怏悵兮然侘傺而夷猶懷孤憤以紆鬱兮遭迴腸而優  
柔嗟百歲之易邁兮胡寡歡而多憂當其羣嬉而愉樂  
兮寧知愁苦而淹留欲剪迹而橫逝兮非弱質之勝耄

欲蕩志以怡悅兮畏淫肆之為尤固自厲其不豫兮惟  
靜默之相攸庶尚友於古人兮考往則以臧謀

**原書**後漢崔瑗與葛元甫書曰今遣奉書錢千為贄并  
送許子十卷貧不及素但以紙耳 馬融與竇伯向書

曰孟陵奴來賜書見手跡歡喜何量次於面也書雖兩  
紙紙八行行七字七八五十六字百三十二言耳 延  
篤答張奐書曰惟別三年夢想言念何日有違伯英來  
惠書盈四紙讀之三復喜不可言 張奐與陰氏書曰  
篤念既密文章燦爛名實相副奉讀周旋紙敝墨渝不  
離於手 晉庾冰與王羲之書曰得示連紙一文致辭



一千祇增其歎耳了無解於往懷 **增**陳徐陵答族人  
梁東海太守長孺書曰恩報近歲奉使來歸辱彼何清  
年終告行并惠以明鏡亟離寒暑雖復時陳梁鶴日照  
孫鸞言慰相思反增離眷劉傅二常侍還又承書札銀  
鈎甚麗玉疏依然開封伸紙破愁為笑素秋方屆溽暑  
稍闌體中何如善保元吉叢臺之僻少海之珠何必鄉  
里所在為貴卿託身大國既已積年彼朝英彥理相欽  
掇方當交辟三命清宦兩宮何乃闕然遲有問也吾七  
十之歲崦嵫已迫朽老之疾隨年而甚徒懷北邙之切  
未遂東都之期牽役承閒但有衰頓賢從君政佐佑興

基中舍謹殿中並休宜自別有書問來告訪吾文章吾  
自歸來鄉國亟徙炎涼牽課疲朽不無辭製而應物隨  
時未曾編錄既承今告輒復搜檢行人相繼別簡知音  
但既乏新聲全同古樂正恐多慚於協律致睡於文侯  
耳燕南趙北地角天涯言接末由但以潛歛善敬德中  
郎並比境之良選皇華之上求若可輜軒別當委白君  
問 唐韋述答蕭十書曰述白忽枉書問詞高理博尋  
翫反覆罔知厭倦述聞登太山者觀叢薄而迷其方面  
涉瀛洲者挹波濤而惜其淺深蓋廣大則昧然難為究  
足下貫穿羣言靡不該覽聞一以知十切問而近思詞



人之淵藪僕誠不敏何以當斯乎足下無棄芻蕘輕投  
瓊玖講學先訓足以起予所發微言孰不賈勇謹當掃  
陋巷之庭宇望君子之軒車博約之道以俟會面 符  
載答澤潞王尚書書曰某有舊故為南康郡太守今年  
夏五月往遊其門至冬十月歸山下遂於江州盧使君  
處伏奉書問并觀押衙盧從史所留示委曲重詞異禮  
一何特達捧讀慙恐若無憑依伏惟尚書忠厚淳粹發  
於大造靈姿傑立長材卓然以社稷為生死以勲庸為  
倚任義感生於慷慨聞望歸於德禮屬思宏邁遠蹤前  
人由是天子以山東之利兵廣土授之使長於諸侯蓋

有以也夫翊王公之美者莫如賢贊策畫之利者莫如  
才延納優劣不啻什百如某者一蓬華士也癡緩樸訥  
無可採擇性嗜閒退不求聲利頃在山林中飲泉斲藥  
保養性命時運不適即覽閱六籍或持竿釣魚以此竟  
歲人世機事視之懵然不悟高明橫加鄙夫手疏襟素  
不飾文字是所謂嘗蘇草而掇蘭蕙簸礫石而揀瓌璧  
欲自隗始為天下士君子之先伏知異日截犬戎壹宇  
宙拯民戴主在此志也念茲菲薄無用禪補況且多病  
形憊氣衰不任策使實貽敗累未獲趨拜謝恩鈴閣又  
南歸日晚酬答稽踈瞻望旌麾惶灼無次古人有感一



言重一顧期於殞越請報國士即小子平生之旨豈無  
是耶伏惟開懷察納不記疵愆幸甚幸甚不宣 又寄  
贈于尚書書曰朱校書至猥辱書問并示孟處士碑篆  
端由捧讀彌日抃躍無次夫旌善人採遺美蓋有位君  
子之所行志豈伊薄劣敢議發揮言輕賜重益用惶駭  
又於朱校書處恭觀製作約數十篇高格侔山嶽迅勢  
擬波濤邁氣薄雲霄遠思躡鵷鴻當世翰墨都無此手  
臙腑怳怳至今悸動斯可謂煥乎文章也一昨奉辭伐  
罪統貔虎之師沈謀偉略洞入神鬼以鎮則有制以戰  
則有威巍巍赫赫聲振寰海斯可謂盛乎武事也文武

吉甫佐天子贊襄使姦臣賊子無萌芽於禍亂者我尚  
書之謂矣小人君子咸知幸甚其一凡夫也棲遁匡廬  
垂二十年讀書不及於豎儒把筆纔過於常談泯泯人  
世鄰乎強仕斯亦不足畏也然徒有愚妄之意愛大名  
慕大節懸芳竹帛為千古榮勲懇懇正為此耳小子  
聆閣下之事業英姿豪韻迥如古人私心歡喜動作顛  
沛况前旨稠疊猥賜誘喻令一至峴首追賞風景小生  
何人當此珍重誠宜奔走拜伏旌麾間識征南之儀觀  
揖當陽之談話凝襟滯想從茲泄露屬入夏多病氣力  
衰羸火雲始生道路且遠瞻仰尊重魂爽飄然若望溟



海未知濟涉如此誠激何緣上達唯有簡牘可寄肺腸  
今故特差祇舍人呂及自潯陽專往奉狀塵獻鈴閣伏  
惟鑒察愚朴不責狂瞽幸甚幸甚候問起居之禮謹俟  
異日此無多談

**增序**唐歐陽詹贈陳八秀才赴舉序曰諸侯歲貢俊秀  
於天子故陳侯今年有觀光之舉白露肅物青天始高  
雲迴鴻磐言導永途吾觀夫雄心銳志將領能事則夷  
山堙谷不盡其心力何東堂一枝南荆一片足塵土其  
慮耶勉哉陳侯有其才奏其試知有成矣  
淵鑑類函卷三百三

淵鑑類函卷三百四

人部六十三 言志

言志一

**原**尚書曰詩言志 禮記曰志之所至詩亦至焉詩之  
所至樂亦至焉 **增**又儒行曰身可危也而志不可奪  
也雖危起居竟信其志 論語曰匹夫不可奪志也  
孟子曰懦夫有立志 **原**毛詩序曰詩者志之所之也  
在心為志發言為詩 **增**學記曰記曰凡學官先事士  
先志 劉向說苑曰鐘鼓之聲怒而擊之則武憂而擊  
之則悲喜而擊之則樂其志變其聲亦變其志誠通乎



金石而況人乎 明詞林人物考曰洪武幸北京命太子監國楊士奇同蹇義輔導太子問詩法士奇對曰詩以言志明良喜起之歌南薰之詩可見舜之志漢高祖大風唐太宗雪恥除兇之作所尚者霸力非王道漢武秋風辭志氣已衰若隋煬帝陳後主皆不足道 又曰永樂二年選進士曾榮等名翰林庶吉士入見諭之曰人須立志遠大不可安於小成爲學必造道德之微具體用之全爲文必並驅班馬韓歐如此未有不成者

言志二

原論語曰顏淵季路侍子曰盍各言爾志子路曰願車

馬衣輕裘與朋友共敝之而無憾顏淵曰願無伐善無施勞子路曰願聞子之志子曰老者安之朋友信之少者懷之 又子曰飯蔬食飲水曲肱而枕之樂亦在其中矣不義而富且貴於我如浮雲 又曰葉公問孔子於子路子路不對子曰女奚不曰其爲人也發憤忘食樂以忘憂不知老之將至云爾 又曰子路曾皙冉有公西華侍坐子曰居則曰不吾知也如或知爾則何以哉子路率爾而對曰千乘之國攝乎大國之間加之以師旅因之以饑饉由也爲之比及三年可使有勇且知方也夫子哂之求爾何如對曰方六七十如五六十求



也為之比及三年可使足民如其禮樂以俟君子赤爾  
何如對曰非曰能之願學焉宗廟之事如會同端章甫  
願為小相焉點爾何如鼓瑟希鏗爾舍瑟而作對曰異  
乎三子者之撰子曰何傷乎亦各言其志也曰暮春者  
春服既成冠者五六人童子六七人浴乎沂風乎舞雩  
詠而歸夫子喟然歎曰吾與點也 家語曰孔子北遊  
登於農山之上子路子貢顏回侍側孔子四望喟然而  
歎曰於斯致思無所不至矣二三子各言其志吾將擇  
焉子路進曰願得白羽若月赤羽若日鐘鼓之音上振  
於天旌旗繽紛下蟠於地由當一隊而敵之搴旗執馘

唯由能之使夫二子從我焉夫子曰勇哉子貢曰賜願  
使齊楚合戰兩壘相當旗鼓相望埃塵連接促刃交兵  
賜著縞衣白冠陳說其間推論利害二國釋患惟賜能  
之使夫二子從吾焉夫子曰辨哉顏回曰回聞薰蕕不  
同器而藏堯桀不共國而治以類異也回願得明王聖  
主而相之敷其五教遵之禮樂使城郭不脩溝洫不越  
鑄兵刃為農器放牛羊於原藪室家無怨曠之思千載  
無戰鬪之患則由無所施其勇而賜無所用其辨矣夫  
子懍然曰美哉德也不傷財不害民不繁辭則顏氏之  
子有焉 孝經鉤命決曰孔子曰吾志在春秋行在孝



經以春秋屬商以孝經屬參 史記曰陳涉嘗與人傭  
耕輟耕於壟上悵悵久之曰苟富貴無相忘傭者笑而  
應之曰若為傭耕何富貴乎涉大息曰嗟乎燕雀焉知  
鴻鵠之志哉 漢揚雄自敘曰雄為人簡易佚宕默而  
好深湛之思清淨無為少嗜慾不汲汲于富貴不戚戚  
於貧賤不脩廉隅以微名當世無擔石之儲晏如也自  
有大度非聖哲之書不好也非其意雖富貴不事也  
東觀漢記曰初光武適新野聞陰后美心悅之後至長  
安見執金吾甚盛因歎曰仕宦當作執金吾娶妻當得  
陰麗華 後漢書馬少遊謂其從兄援曰士生一世但

取衣食裁足乘下澤車御欵段馬守墳墓鄉里稱善人  
斯可矣 **增**又曰馬援字文淵扶風茂陵人少有大志  
嘗謂人曰丈夫為志窮當益堅老當益壯 又馬援曰  
男兒當戰死沙場以馬革裹尸還葬幸矣安能臥牀上  
死兒女子手中耶 **原**又曰馮衍有大志不戚戚于貧  
賤常慷慨歎曰行少事名賢經歷顯位懷金垂紫竭節  
奉使不求苟得常有凌雲之志三公之貴千金之富不  
得其願不槩于懷貧而不衰賤而不恨年雖疲曳猶庶  
幾名賢之風脩道德于幽冥之路以終身名為後世法  
又曰班超字仲升家貧傭書乃投筆歎曰大丈夫無



他志略猶當如傅介子張騫立功異域以取封侯安能  
久事筆硯間乎後果立功封定遠侯 又曰梁竦字敬  
叔自負其才鬱鬱不得其意登山遠望歎息曰大丈夫  
生當封侯死當廟食如不然閒居足以養志詩書足以  
自娛州郡之職但勞人耳 又曰仲長統字公理常欲  
卜居清曠以樂其志曰濯清水追涼風釣遊鯉弋高鴻  
不受當世之責永保性命之期則可以凌雲霄出宇宙  
之外矣 **增**南史曰王融行過朱雀航聞人爭路乃搥  
車鐸曰車中乃可無七尺車前豈可無八騶 **原**張璠  
漢紀曰孔融拜太中大夫雖居家失勢賓客日滿其門

愛才樂士常若不足每歎曰坐上賓常滿樽中酒不空  
吾無憂矣 **增**又曰趙溫字子柔初為京兆郡丞題曰  
大丈夫當雄飛無能雌伏 **原**吳書曰鄭泉性嗜酒閒  
居每曰願得美酒滿五百斛船以四時甘肥置兩頭反  
覆沒飲之憊即住而啖肴膳酒有升斗減隨即益之不  
亦快乎 **增**晉書曰王濬恢廓有大志嘗起宅開門前  
路廣數十步或謂太過濬曰吾欲使容長戟旛旗後拜  
將軍封襄陽縣侯 **原**晉中興書曰畢卓為吏部郎嘗  
謂人曰右手持酒杯左手持蟹螯拍浮酒池中便足了  
一生 **增**南史曰宋鮑昭嘗謁臨川王義慶未見知欲



貢詩言志或止之曰卿位尚卑不可輕慢大王昭勃然曰千載上有英才異士沈沒而不聞者安可勝數哉大丈夫豈可遂蘊知能使蘭艾不辨終日碌碌與燕雀相隨乎於是奏詩義慶可之賜帛二十疋 梁書曰曹景宗既貴謂所親曰昔我在鄉里騎快馬如龍與年少輩數十騎拓弓弦作霹靂聲箭如鷲鷗叫平澤中逐麇數肋射之渴飲其血飢食其胃甜如甘露漿覺耳後風生鼻頭火出此樂使人忘死不知老之將至今來揚州作貴人動轉不得行路開車幔小人輒言不可閉置車中如二日新婦念此邑邑使人氣盡 陳書曰周文育少

時父使人寫蔡邕勸學及古詩書之文育不省曰但知有大槩耳誰能學此取富貴 北史曰高昂龍準豹頸姿體雄異少不尊師教專事驅馳每言男兒當橫行天下自取富貴誰能端坐讀書作老博士也其父曰此兒不滅吾族必大吾門以其昂藏教曹故以名字之 隋書曰煬帝遼東之役麥鐵杖請為前鋒顧醫者吳景賢曰性命自有所在豈能艾炷灸頰瓜蒂敷鼻療黃不差而臥死兒女掌中乎將度遼呼三子曰阿奴備淺色黃衫吾荷國恩今是死日我得被殺爾當富貴惟誠與孝爾其勉之 又曰來護兒幼卓犖讀書至擊鼓其聲踊



躍用兵羔裘豹飾孔武有力舍書歎曰大丈夫在世當如是會為國滅賊以取功名安能區區事筆硯乎遂覽兵法曰此豈異人意也唐書曰陳子昂初入京不為人知有賣胡琴價百萬豪貴傳視無辨者子昂突出顧左右曰釐千緡市之衆驚問荅曰余善此樂皆曰可得聞乎曰明日可集宣陽里如期偕往則酒榷畢具置胡琴於前食畢捧琴語曰蜀人陳子昂有文百軸馳走京轂碌碌塵土不為人知此樂賤工之役豈宜留心舉而碎之以其文軸徧贈會者一日之內聲華溢都又曰李靖字藥師京兆三原人姿貌魁秀通書史嘗謂所親

曰丈夫遭遇要當以功名取富貴何至作章句儒又曰魏徵見帝曰願陛下俾臣為良臣毋俾臣為忠臣又曰來濟與高智周郝處俊孫處約客宣城石仲覽家仲覽衍於財有器識待四人甚厚私相與言志處俊曰願宰天下濟及智周亦然處約曰願為通事舍人足矣後濟領吏部處約始以瀛洲書佐入調濟遽注曰如志遂以為通事舍人後皆至公輔又曰劉知幾撰劉氏家史及譜考上推漢為陸終苗裔非堯後彭城叢亭里諸劉出楚孝王酈曾孫居巢後殷不承元王常曰吾若得封必以居巢紹司徒舊邑後果封居巢縣子鄉人以



其兄弟六人俱有名號其鄉曰高陽里曰居巢 又曰李邕既冠見特進李嶠自言讀書未遍願一見祕書嶠曰祕閣萬卷豈時日能習邕固請乃假直祕書未幾辭去嶠驚試問奧篇隱帙了辯如響嶠歎曰子且名家 又曰馬麟岐州扶風人少孤流蕩無業年二十讀漢馬援傳至丈夫當死邊野以馬革裹尸而歸慨然曰使吾祖勲業墜于地乎開元末挾策從安西節度府以奇勞累遷金吾衛將軍後進扶風郡王 又曰柳渾字夷曠梁僕射暎六世孫後籍襄州早孤方十歲有巫告曰兒相天且賤為浮屠道可緩死諸父欲從其言渾曰去聖

教為異術不若速死學愈篤 又曰陸贄輔政不敢自顧重事有可否必言之所言皆懇到深切或規其太過者對曰吾上不負天子下不負所學惶他恤乎 又曰馬燧姿度魁傑長六尺二寸與諸兄弟輟策歎曰天下有事丈夫當以功濟四海渠老一儒哉更學兵書戰策沈勇多算以功拜司徒兼侍中 又曰獨孤及字至之河南洛陽人為兒時讀孝經父試之曰兒志何語對曰立身行道揚名於後世宗黨奇之 又曰黃碣閩人也初為閩小將喜學問軒然有志向同列有假其筆者碣怒曰是筆他日斷大事不可假後戰安南有功高駢表



為漳州刺史 宋史曰范仲淹雅以天下為己任其言  
曰士當先天下之憂而憂後天下之樂而樂 又曰郭  
勸嘗謂諸子曰顏魯公云生得五品服章絨任子為齋  
郎足矣及再為侍諫曰吾起諸生志不過郡守今年七  
十列侍從可以歸矣遂用元日拜章 又曰包拯嘗曰  
後世子孫仕宦有犯賊者不得放歸本家死不得葬大  
塋中不從吾志非吾子孫也 又曰范純仁求罷諫職  
改判國子監去意愈確執政遣人諭留已擬知制誥純  
仁曰此言何為至於我哉言不用萬鐘非所顧也常曰  
我平生所學得之忠恕二字一生用不盡 又曰黃度

以人物為己任推挽不休每曰無以報國惟有此耳  
又曰黃夢鼎與賈似道不合累辭求去扁舟徑歸使者  
以禍福告夢鼎語之曰廉恥事大生死事小 又曰紹  
聖中尹焞嘗應舉發策有誅元祐諸臣議不對而出告  
頤曰焞不復應進士舉矣頤曰子有母在焞歸告其母  
陳母曰吾知汝以善養不知汝以祿養靖康初种師道  
薦召至京師不欲留賜號和靖處士 又曰陸九淵讀  
古書至宇宙二字解者曰四方上下曰宇往古來今日  
宙忽大省曰宇宙內事乃己分內事已分內事乃宇宙  
內事 又曰朱熹入奏有要之於路以為正心誠意之



論上所厭聞熹曰吾平生所學惟此四字豈可隱默以欺我君乎又曰李燔嘗曰凡人不必待仕宦有位為職事方為功業但隨力到處有以及物即功業矣又嘗曰仕宦至卿相不可失寒素體又曰陳亮詣闕上書孝宗欲官之亮笑曰吾欲為社稷開數百年之基寧用以博一官乎元史曰月乃合父昔里吉思辟尚書省死國事贈輔國上將軍乃合好學負氣父死時年方十七奮然投冠於地曰吾父死國難吾獨不能紓家難乎又曰禿忽魯與也先鐵木兒不忽木從許衡學帝一日問其所學忽魯與不忽木對曰三代治平之法也

又曰鐵木迭兒復引拜住參知政事張思明為左丞以助思明為盡力忌住方正每與其黨密語謀中害之左右得其情乘間以告請備之住曰我祖宗為國元勳世篤忠貞百有餘年今年少叨受寵命蓋以此耳人臣協和國之利也今以右相讐我我求報之非特我二人之不幸亦國家之不幸吾知盡吾心上不負君父下不負士民而已又曰劉駟嘗愛諸葛孔明靜以脩身之語表所居曰靜脩明藝苑卮言曰劉基與夏煜孫炎輩皆以豪俠詩酒得名一日游西湖望建業五色雲起諸君謂慶雲擬賦詩劉飲大白慷慨曰此王氣也後十年



有英主出吾當輔之衆皆掩耳尋太祖下金陵劉建帷  
幄之勲爲上佐開茅土其言若契 明獻徵錄曰朱榮  
負奇氣年未二十膂力絕人初同父僑寓表伯葉氏家  
葉間戲曰男子非士則農商以自立胡爲託迹於人而  
不思所以振厲榮曰人亦發奮有時大丈夫又安知他  
日不爲都督乎聞者甚壯其志無何朝廷下令四方舉  
年少傑特之士以備任使郡以榮應詔擢爲府軍衛驃  
騎舍人實洪武九年丙辰也以功封武進伯 又曰王  
珪合肥人慷慨有大志少時爲淮西廉訪司隸卒見官  
長儀衛尊崇輒慨然歎曰將相無種在人爲耳及元末

兵亂募集鄉民守廬州自稱萬戶上取和陽珪自廬州  
來歸遂從渡江克太平命珪仍爲萬戶積功陞左軍都  
督僉事 又曰方孝孺年十四侍父北遊齊魯間觀周  
公孔子廟慨然歎曰使吾遊孔門顏閔縱未可幾及其  
餘若樊遲冉有輩豈讓之耶但世無孔子不得依歸耳  
又曰練子寧與金幼孜友善嘗謂之曰子他日必爲  
良臣我必爲忠臣 又曰太祖太宗時累詔郡縣徵遺  
逸或推轂陳亮亮曰昔唐堯在上下有箕穎吾投迹明  
時遊戲泉石吾志慊矣吾豈願仕哉遂掉頭不出作讀  
陳搏傳詩以見志 又曰梁洄衣不問故新必鮮潔完



好居官出入騶從亦整飾如儀法曰吾不能齷齪自汗以取名 又曰謝復嘗從父太古翁游文廟問曰儼然而肖像者非聖賢歟夫非盡人之子歟翁奇之稍長授春秋於于竹坡即了大義已歎曰學以謀道滯心文義以干祿吾弗為也於是潛心經史以古人自期 又曰呂秉彝舉進士銓部選為御史辭弗就復選為黃門給事又辭弗就友人詰之對曰居諱言之朝處必危之地享其名而怠其職非仁趨於始而悔於終不智予殆以親為重乎 又曰陸鈞號石樓六歲入家塾請于母曰讀書後幹得何等事業方為至極母甚喜 又曰鄭世

威嘉靖己丑成進士會臺臣闕詔從諸進士推擇眾競趨之世威曰才脫章句遂躐司耳目毋論躁且虞曠也竟不往 又曰黃裳無以給業幾廢書從賈矣顧適市而心賤之喟然太息曰丈夫竟賈人遊乎則益市書窮日夜讀不休 明詞林人物考曰王尚綱五歲讀孝經至立身揚名以顯父母乃謂其父曰兒長當如此及為吏部郎中值尚書張綵阿逆瑾勢每有私囑輒以正對且反覆理諭綵甚銜之或謂尚綱曰固知不屑富貴如取禍何尚綱曰是有命焉非逢迎所能免 弇州史料曰楊繼盛七歲喪母夷於豎使飯牛牛肥逾年從牧所



以間往里塾觀里中兒誦讀揖遜而心好之歸謂兄請  
得受里塾學兄曰若幼何學公艱然曰夫幼者任牧牛  
乃不任學聽之學公竟學然不廢牧也十餘歲而兵部  
公亦捐館久之兄坐邑賦踐更公遂往代踐更至十三  
而從師受經為舉子業漸有聲十八補邑諸生卒為名  
臣

言志三

**原棄** 擲版 漢終軍字子雲西游入關關吏授軍繻  
後拜謁者持節出關關吏曰此棄繻生也後漢逢  
萌給事縣為亭長時尉過萌候迎拜謁既而擲版歎曰  
大丈夫安能為役 不奪 無時 漢趙岐字邠卿嘗病  
遂之長安學焉

戒兄子曰我死爾乃置一圓石於墓刻之云漢有人姓  
趙名岐有志無時命也奈何後疾瘳仕至太僕岐本名  
嘉 請纓 運甓 說其王欲令入朝內比諸侯軍請  
願受長纓必羈南越王而致之闕下晉陶侃為刺史  
在州無事朝運百甓於齋外暮運百甓於齋內人問其  
故答曰吾方致力中原不使功業棄也 割席 漢傅介子年十  
過爾優悠恐不堪事 棄甓 割席 漢傅介子年十  
華欲同席讀書有乘軒冕過門者寧讀如故散管寧與  
看甓曰富貴須自致非吾友也 磨鐵硯 擊唾壺  
石晉桑維翰初舉不利或勸改業維翰鑄鐵硯示人曰  
硯穿則易他業卒以進士及第 建豹尾  
後輒詠老驥伏櫪志在千里烈士暮年壯心不已  
垂汗青 晉王含謂妻曰男兒不建豹尾不復歸矣遂行  
紙始不負此生 三自反 五不欺 蔡嘗言吾有五不  
擢進士第一 崇監領卷三百四 言志



欺一不欺天二不欺友五不欺君三不欺民  
宋馬伸字頤曰時中東平人紹聖四年進士歷西京法曹求  
學於程頤未嘗死乎頤論其異恐胎子累曰使神得聞道死  
何憾况未嘗死乎頤論其異恐胎子累曰使神得聞道死  
表裏為奸諱出監州酒稅起知廣德軍歷知童貫黃經臣  
得汝求其志曰寧門力辭起知廣德軍歷知童貫黃經臣  
隱居不言誰知其志以焉知鴻鵠下從斗筭言以足志  
足志不言誰知其志以焉知鴻鵠下從斗筭言以足志  
二大漢郭泰字林宗貧賤母令給事縣庭林宗  
清之志卿相之盟然後漢以范滂為認使登車覽轡既  
出衛郭門復與母訣鬻臂而盟曰起不之志使登車覽轡既  
為卿相不復入衛門也後果如其言  
破浪乘風非惡聲也祖起舞晉宗愨字元幹小時叔  
願乘少文問其所志曰因起舞晉宗愨字元幹小時叔  
願乘少文問其所志曰因起舞晉宗愨字元幹小時叔

品高明嘗曰書觀妻子夜卜  
夢寢兩無媿始可以言學  
下之心孺子曰善為宰乎曰使宰天下亦如之後漢用  
其策遂定天下不墮灑答曰大丈夫當掃天下安能事一室  
曰孺子何不下灑灑答曰大丈夫當掃天下安能事一室  
乎勤大何不下灑灑答曰大丈夫當掃天下安能事一室  
奇之元符中浩為諫官畫監京城門病歸許邸狀報塗  
激勵元符中浩為諫官畫監京城門病歸許邸狀報塗  
后畫謂人曰志完不言可以絕交矣浩得罪畫迎諸塗  
浩出涕書正色責志完拂衣謝侂胄浩以氣節相  
滿所當為者未止此也外能死人哉願君毋以此舉自  
將誘以美官夜遣密客詣阮旣不答私謂所親曰吾肯  
效劉歆對畢拂衣出門  
笑哉陸對畢拂衣出門  
關而歎終擁使車漢相如長安乃題橋郡北有昇仙  
乘駟馬不復過此遷中郎果後奉使南陽果乘高車  
而歎曰不乘使者車不復出門後奉使南陽果乘高車

人部  
言志  
西



**增**茅屋石田為生大拙 鳴夷馬革自許同心明劉氏鴻

書曰武宗時人心危疑時兵部職方司郎中黃鞏以母喪服除或厄其行鞏題其書屋云云 步武

有人當道可翻桓典馬 惜陰自我及時須著祖生鞭

明獻徵錄載鄧元錫生而穎特五齡就塾師黃君學試以駢偶隨應云云

言志四

**原**大志遠略 砥礪名節 希顏之志 慕蘭之誠

四方之志左傳姜比謂晉公子重耳曰子有四方之志 **增**千里之志志在千里

獨行不媿影 獨睡不媿衾宋蔡元定貽書訓諸子曰獨行不媿影獨睡不媿衾

魏衾勿以吾得罪故遂解直道還君富貴輸我為同僚惇嘗偕謁

府帥輒毀素所厚善者安民退謂惇曰君若人不厚於君乎惇曰吾心實惡之姑面交耳安民曰君所謂匿怨而

友其人乃李林甫也惇笑曰直道還君富貴輸我安民應之曰處厚富貴天下事可知我當歸山林第恐累陰德 以直行已以正立朝宋張綱嘗書坐右曰以直行已以正立朝以靜退高天下

言志五上

**原**詩後漢傅毅志詩曰咨爾庶士迨時斯曷日月逾

邁豈云旋復於穆我祖顯於殷國貳迹阿衡克光其則

咨予小子穢陋靡逮懼我世烈於茲以墜於戲君子無

恒自逸徂年如流眇茲暇日 **增**仲長統述志詩曰飛

鳥遺迹蟬蛻亡殼騰蛇棄鱗神龍喪角至人能變達士

拔俗乘雲無轡騁風無足垂露成幃張霄成幄沆瀣當

餐九陽代燭恒星豔珠朝霞潤玉六合之內恣心所欲



人事可遺何為局促 酈炎見志詩曰靈芝生河洲動  
搖因洪波蘭榮一何晚嚴霜瘁其柯文質道所貴遭時  
用有嘉賢才抑不用遠投荆南沙抱玉乘龍驥不逢樂  
與和安得孔仲尼為世陳四科 **原**魏曹植矯志詩曰  
芝桂雖芳難以餌烹尸位素餐難以成名磁石引鐵於  
金不連大朝舉士愚不聞焉抱僻塗乞無為貴寶履仁  
溝禍無為貴道鷓鴣遠害不羞卑栖靈虯避難不恥汙  
泥都蔗雖甘杖之必折巧言雖美用之必滅濟濟唐朝  
萬邦作孚逢蒙雖巧必得良弓賢主雖智亦待英雄螳  
螂見歎齊士輕戰越王軾蛙國以死獻道遠知驥世偽

知賢覆之幬之順天之矩澤如凱風惠如時雨口為禁  
闔舌為發機門機之開楛矢不追 又言志詩曰慶雲  
未時興雲龍潛作魚神鸞失其儔還從燕雀居 阮籍  
詠懷詩曰天地煙煨元精代序清陽曜靈和氣容與於  
赫帝朝伊衡作輔才非允文器非經武適彼沅湘託介  
漁父優哉游哉爰居爰處 又曰清風肅肅脩夜漫漫  
獻歌傷懷獨寐寤言臨觴拊膺對食忘餐世無萱草令  
我哀歎 又曰河上有丈人緯蕭棄明珠甘彼藜藿食  
樂是蓬蒿廬豈效續紛子良馬騁輕輿朝生衢路傍夕  
瘞橫術隅歌笑不終宴俯仰復欷歔鑒茲二三者憤懣



從此舒 又曰幽蘭不可佩朱草為誰榮脩竹隱山陰  
射干臨增城 又曰駕言發魏都南向望吹臺蕭管有  
遺音梁王安在哉戰士食糟糠賢者處蒿萊歌舞曲未  
終秦兵復已來 又曰木槿榮丘墓煌煌有光色白日  
頽林中翩翩雲路側蟋蟀吟戶牖螻蛄鳴荆棘蟬蛸玩  
三朝采采循羽翼 又曰一日復一日一夕復一晨容  
色改平常精魂自飄淪臨觴多哀楚思我故情人對酒  
不能言悽愴懷酸辛 又曰鴻鵠相隨飛隨飛適荒裔  
雙翻臨長風須臾萬里逝朝餐琅玕實夕宿丹山際託  
身青雲中網羅不能制豈與鄉曲士攜手共言誓 又

曰鷺鳩飛桑榆海鳥運天地豈不識宏大羽翼不相宜  
招搖安可翔不若棲樹枝下集蓬蒿間上遊園囿籬但  
爾亦自足用子為追隨 又曰嘉樹下成蹊東園桃與  
李秋風吹飛藿零落從此始繁華有顛顛堂上生荆杞  
又曰天馬出西北由來從東道春秋非有託富貴焉  
常保清露被臯蘭凝霜霑野草 又曰平生少年時輕  
薄好弦歌西遊咸陽中趙李相經過娛樂未終極白日  
忽蹉跎驅馬復來歸反顧望三河黃金百鎰盡資用常  
苦多北臨太行道失路將如何 又曰步出上東門北  
望首陽峯下有采薇士上有嘉樹林良辰在何許凝霜



霑衣襟寒風振山岡元雲起重陰鳴雁飛南征鷓鴣發  
哀音素質遊商聲悽愴傷我心 又曰昔年十四五志  
尚好詩書被褐懷珠玉顏閔相與期開軒臨四野登高  
望所思丘墓蔽山岡萬世同一時千秋百歲後榮名安  
所之 又曰徘徊蓬池上還顧望大梁綠水揚洪波曠  
野濛茫茫 又曰寧與燕雀翔不隨黃鵠飛黃鵠遊四  
海中途將安歸 又曰北里多奇舞濮上有微音輕薄  
閒遊子俯仰乍浮沈焉見王子喬乘雲翔鄧林獨有延  
年術可用慰我心 又曰南國有佳人容華若桃李朝  
遊江北岸夕宿瀟湘沚時俗薄朱顏誰爲發皓齒 又

曰夜中不能寐起坐彈鳴琴薄帷鑒明月清風吹我襟  
孤鴻號外野翔鳥歸北林徘徊將何見憂思獨傷心

**增**又阮籍詠懷詩曰若華曜西海扶桑翳瀛洲日月經  
天塗明暗不相讐窮遠自有常得失又何求豈效路上  
童攜手共遨遊陰陽有變化誰云沈不浮朱鷺躍飛泉  
夜飛過吳洲俯仰運天地再撫四海流繫累名利場鴛  
駿同一輶豈若遺耳目升遐去殷憂 嵇康述志詩曰  
潛龍育神軀濯鱗戲蘭池延頸慕大庭寢足俟皇義慶  
雲未垂景盤桓朝陽陂悠悠非吾匹疇肯應俗宜殊類  
難徧周鄙議紛流離輶軒丁悔吝雅志不得施耕耨感



甯越馬席激張儀逝將離羣侶杖策追洪崖焦鵬振六  
翮羅者安所羈浮遊太清中更求新相知比翼翔雲漢  
飲露餐瓊枝多念世間人夙駕咸驅馳沖靜得自然榮  
華安足爲 何晏言志詩曰雙鶴比翼遊羣飛戲太清  
常恐失網羅憂禍一旦并豈若集五湖順流唼浮萍道  
遙於志意何爲怵惕驚 原晉張華勵志詩曰仁道不  
遐德輶如羽求焉斯至衆鮮克舉復禮終朝天下歸仁  
若金受礪若泥在鈞進德脩慧暉光日新 傅休奕雜  
詩曰閨夜微風起明月照高臺清響呼不應遠景招不  
來厨人進藿茹有酒不盈杯安貧福所與富貴爲禍媒

金玉雖高堂於我賤蒿萊

張翰詩曰暮春和氣應白

日照園林青條若總翠黃花如散金榮與壯俱去賤與  
老相尋 又曰東鄰有一樹三紀裁可拱無花復無實

亭亭雲中竦隙禽不爲巢短翮莫肯任 又曰忽有一

飛鳥五色雜英華一鳴衆鳥至再鳴衆鳥羅長鳴搖羽

翼百鳥互相和 張協詩曰瓠瓠夸瑛璠魚目笑明月

不見郢中歌能否居然別陽春無和者巴人皆下節

又曰此鄉非吾地此郭非吾城折衝樽俎間制勝在兩

楹巧遲不足稱拙速乃垂名 釋支遁述懷詩曰總

角敦大道弱冠弄雙元逡巡釋長羅高步尋帝先妙損



階元老忘懷濠川達觀無不可吹累皆自然窮理增  
靈新昭昭神火傳熙怡安冲漠優游樂靜閒膏腴無爽  
味婉變非雅弦恢心委形度疊疊隨化遷 史宗詠懷  
詩曰有欲苦不足無欲亦無憂未足清虛者帶索被元  
裘浮游一世間況若不繫舟方當畢塵累棲志老山丘  
**原**宋謝靈運憶山中詩曰採菱調易急江南歌不緩  
楚人心昔絕越客腸今斷斷絕雖殊念俱為歸慮欵  
又曰韓亡子房奮秦帝魯連恥本自江海人忠義感君  
子 謝惠連詩曰夕坐苦多慮行歌踐閨中房權引傾  
月步檐結春風 鮑昭雜詩曰十五諷詩書篇翰靡不

通弱冠參多士飛步遊春宮側覩君子論豫見古人風  
兩說窮舌端五車摧筆鋒羞當白璧貶恥受聊城功晚  
節從世務乘障遠和戎解珮襲犀渠卷帙奉盧弓始願  
力不及安知命所終 齊謝朓冬緒羈懷詩曰去國懷  
丘園入遠滯城闕寒燈耿宵夢清鏡悲晚髮風草不留  
霜冰池共如月 梁江淹效阮公詩曰歲暮懷感傷中  
夕弄清琴戾戾曙風急團團明月陰愁雲出北山宿鳥  
驚東林誰謂人道曠憂慨自相尋寧知霜雪後獨見竹  
柏心 又曰十五學詩書顏華常美好不逐世間人鬪  
雞東郊道富貴如浮雲金玉不為寶一旦鷓鴣鳴嚴霜

人部  
謝靈運函卷三百四  
言志



被勁草志氣多感失泣下霑懷抱 又曰夕雲映西山  
蟋蟀吟桑梓零落被百草秋風吹桃李君子懷苦心感  
慨不能止駕言遠行遊驅馬清河浹寒暑更進退金石  
有終始光色俯仰間英豔難久恃 **增**又擬嵇中散康  
言志詩曰曰余不師訓潛志去世塵遠想出宏域高步  
超常倫靈鳳振羽儀戢景西海濱朝食琅玕實夕飲玉  
池津處順故無累養德乃入神曠哉宇宙惠雲羅更四  
陳哲人貴識義大雅明庇身莊生悟無為老氏守其真  
天下皆得一名實久相賓咸池饗爰居鐘鼓或愁辛柳  
惠善直道孫登庶知人寫懷良未遠感贈以書紳 **原**

吳均詠懷詩曰僕本報恩人走馬救東秦黃龍暗迢遞  
清泥寒苦辛野戰劔鋒盡攻城才智貧唯餘一死在留  
持贈主人 又曰元淑勢位卑長卿宦情寡二頃且營  
田三錢聊飲馬懸風白雲上掛月青山下心中欲有言  
未得忘言者 **增**陳張君祖詠懷詩曰運形不標異澄  
懷恬無欲座可柄王侯門可迴金轂風來詠逾清鱗萃  
淵不濁斯乃元中子所以矯逸足何必翫幽閒青衿表  
離俗百齡苟未遐昨辰亦非促曦騰望舒映曩今迭相  
燭一世皆逆旅安悼電徃速區區雖非黨兼忘混礫玉  
恪神罔叢穢要在夷心曲 **原**周庾信詠懷詩曰步兵



未飲酒中散未彈琴索索無貞氣昏昏有俗心涸鮒常  
思水驚飛每失林風雲能變色松竹且悲吟由來不得  
意何必往長岑 又曰無悶無不悶有待何可待昏昏  
如坐霧漫漫疑行海千年雖未清一代人先改昔日東  
陵侯唯見瓜園在 又曰疇昔國士遇生平知己恩直  
言珠可吐寧知炭欲吞一顧重尺璧千金輕一言悲傷  
劉孺子悽愴史王孫無因同武騎歸守灞陵園 又曰  
周王逢鄭忿楚后值秦冤梯衝已鶴列冀馬忽雲屯武  
安檐瓦振昆陽猛獸奔流星夕照境烽火夜燒原古獄  
饒冤氣空亭多枉魂天道或可問微兮不忍言 又曰

蕭條亭障遠悽愴風塵多關門臨白狄城影入黃河秋  
風別蘇武寒水送荆軻誰言氣蓋世晨起帳中歌 增  
又擬詠懷詩曰惟忠且惟孝為子復為臣一朝人事盡  
身名不足親吳起常辭魏韓非遂入秦壯情已消歇雄  
圖不復申移住華陰下終為關外人 原北齊顏之推  
古意詩曰十五好詩書二十彈冠仕楚王賜顏色出入  
章華裏作賦凌屈原讀書誇左史數從明月讌或侍朝  
雲祀登山摘紫芝泛江採綠芷歌舞未終曲風塵聞天  
起吳師破九龍秦兵割千里狐兔穴宗廟霜露霑朝市  
僻入邯鄲宮劔去襄城水不獲殉陵墓獨生良足恥憫



江表類傳卷三百四  
三  
憫思舊都惻惻懷君子白髮闕明鏡憂傷沒余齒 又  
曰寶珠出東國美玉產南荆隋侯曜我色卞氏飛吾聲  
已加明稱物復飾夜光名驪龍旦夕駭白虹朝暮生華  
彩燭兼乘價值距連城常悲黃雀起每畏靈蛟迎千仞  
安可舍一毀難復營昔為時所重今為時所輕願與濁  
泥會思將垢石并歸真川岳下抱潤潛其榮 **壇**唐魏  
徵述懷詩曰中原還逐鹿投筆事戎軒縱橫計不就慷  
慨志猶存策杖謁天子驅馬出關門請纓繫南越憑軾  
下東藩鬱紆陟高岫出沒望平原古木鳴寒鳥空山啼  
夜猿既傷千里目還驚九折魂豈不憚艱險深懷國士

恩季布無二諾侯嬴重一言人生感意氣功名誰復論

崔日知冬日述懷奉呈韋祭酒張左丞蘭臺名賢詩

曰弱齡好經籍披卷即怡然覃精四十載馳騁數千言

孔辟采遺篆一作帙周韋考絕編袁公論劔術孫子敘兵

篇魯史君臣道姬書日月懸從師改炎燠負笈遍山川

上異西河夏中非北海元光榮拾青紫名價接通賢既

重萬鐘樂寧思二頃田長戟同分虎高冠互附蟬晚懷

重虛曠養志息雕鐫登高慙思拙匠物謝情妍不慕張

平子寧希一作思王仲宣誰謂登龍日翻成刻鵠年循循

勞善誘軌軌思微牽琢磨才既竭鑽仰德彌堅朽木誠



為諭捫心徒自憐終期吞鳥夢振翼上雲煙賦成先擲  
地詞高直拔天更執摳衣禮仍開函文筵霧披槐市藹  
水靜僻池圓願逐從風葉飛舞翰林前 張九齡敘懷  
詩曰弱歲讀書史抗迹追古人被褐有懷玉佩印從負  
薪志合豈兄弟道行無賤貧孤根亦何賴感激此為鄰  
李白書懷贈南陵常贊府詩曰歲星入漢年方朝見  
明主調笑當時人中天謝雲雨一去麒麟閣遂將朝市  
乖故交不過門秋草日上階當時何特達獨與我心諧  
置酒凌歊臺歡娛未曾歇歌動白紵山舞迴天門月問  
我心中事為君前致詞君看我才能何似魯仲尼大聖

猶不遇小儒安足悲雲南五月中頻喪渡瀘師毒草殺  
漢馬張兵奪秦旗至今西洱河流血擁僵屍將無七擒  
略魯女惜園葵咸陽天下樞累歲人不足雖有數斗玉  
不如一盤粟賴得契宰衡持鈞慰風俗自顧無所用辭  
家方未歸霜驚壯士髮淚滿逐臣衣以此不安席蹉跎  
因世違終當滅衛謗不受魯人譏 杜甫寫懷詩曰夜  
深坐南軒明月照我膝驚風翻河漢梁棟已出日羣生  
各一宿飛動自儔匹吾亦驅其兒營營為私實天寒行  
旅稀歲暮日月疾榮名忽中人世亂如蟣虱古者三皇  
前滿腹志願畢胡為有結繩陷此膠與漆禍首燧人氏



湖鏡卷一百四  
厲階董狐筆君看燈燭張轉使飛蛾密放神八極外俯  
仰俱簫瑟終契如往還得非合仙術 獨孤及丙戌歲  
正月出洛陽書懷詩曰往歲衣褐見受服金馬門擬將  
忠與貞求酬主人恩天地斲雷雨洪波生平原窮鱗遂  
蹭蹬夙昔事罕存幸逢帝出震授鉞清東藩白日忽再  
中萬方咸駿奔王風從西來春光滿乾坤蟄蟲競飛動  
余亦辭籠樊遭遇思自強寵辱安足言唯將四方志回  
首謝故園 元稹紀懷贈李六戶曹崔二十功曹五十  
韻詩曰昔冠諸生首初因正道徵公卿碧雞會名姓白  
麻稱日月光遙射煙霄志漸弘榮班張錦繡諫路賤賤

藤便欲呈肝胆何言犯股肱椎埋衝斗劍清徹瑩壺水  
赤縣纔分務青驄已迴乘因騎度海鵠擬殺蔽天鵬縛  
虎聲空壯連鰲力未勝風翻波竟蹙山壓勢逾崩僂辱  
徒相困蒼黃性不能酣歌離峴頂負氣入江陵華表當  
蟾魄高樓掛玉繩角聲悲掉蕩城影暗稜層軍幕威容  
盛官曹禮數兢心雖出雲鶴身尚觸籠鷹竦足良甘分  
排衙苦未曾通名參將校抵掌見親匆啣沫求涓滴滄  
波怯斗升荒居鄰鬼魅羸馬步蹉凌白草堂簷短黃梅  
雨氣蒸霑黏經汗席颭閃盡油燈夜怯餐膚蚋朝煩拂  
面蠅過從愁厭賤專靜畏猜仍旅寓誰堪託官聯自可



洪金英白卷三百四  
憑甲科崔並鷺柱史李齊昇共展排空翼俱遭激遠矰  
他鄉元易感同病轉相矜投分多然諾忘言少愛憎誓  
將探肺腑恥更辨淄澠會宿形骸達論交意氣增一心  
吞渤解戮力拔蒿恒語到磨圭角疑消破弩癥吹嘘期  
指掌患難許擔簦鍛翮鸞棲棘藏鋒箭在弮雪中方睹  
桂木上莫施管且汎魚沿水兼過被病僧有時鞭欵段  
盡日醉僂僂躡屐看秧稻敲船和採菱叉魚江火合喚  
客谷神應嘯傲雖開口幽憂復滿膺望雲鰭撥刺透匣  
色騰凌每想潢池寇猶稽赤族懲夔龍勞算畫貔虎帶  
威稜逐鳥忠潛奮懸旌意遠凝弦弓思徹札絆驥悶牽

緬運甃調辛苦聞雞屢寢興閒隨人兀兀夢聽鼓鼙鼙  
班筆行看擲黃波莫漫澄麒麟高閣上須及壯時登  
李商隱詠懷寄祕閣舊僚二十四韻詩曰年鬢日堪悲  
衡茅益自嗤懸頭曾苦學折臂反成醫僕御嫌夫孺孩  
童笑叔癡小男方嗜栗幼女漫憂葵遇炙誰先噉逢糞  
即便吹官銜同畫餅面貌乏凝脂典籍將蠹測文章若  
管窺圖形翻類狗入夢肯非羆自晒成書篋終當咒酒  
卮懶霑襟上血羞鑷鏡中絲橐籥言方喻樗蒲齒詎知  
事神徒惕慮佞佛愧虛辭曲藝垂麟角浮名狀虎皮乘  
軒寧見寵巢幕更逢危禮俗拘嵇喜侯王欣戴逵途窮



方結舌靜勝但堵頤糲食空彈劔亨衢詎置錐柏臺成  
口號芸閣暫肩隨悔逐遷鶯伴誰觀擇虱時瓮間眠太  
率牀下隱何卑奮迹登弘閣摧心對董帷校讐如有暇  
松竹一相思 馬戴失意書懷呈知己詩曰直道何由  
啓聖君非才誰敢議論文心存黃籙兼丹訣家憶青山  
與白雲麋鹿幽棲閒可近鸛鸞高舉勢宜分微生不學  
劉琨輩劔刃相交擬立勳 崔塗言懷詩曰干時雖苦  
節趨世且無機及覺知音少翻疑所業非青雲如不到  
白首亦難歸所以滄江上年年別釣磯 宋寇準秋夜  
獨坐勉友詩曰西風驚萬木危坐思悠哉故國今年別

秋鴻半夜來人應多棄善天豈不憐才休學嚴夫子荒  
涼老釣臺 魏野書友人屋壁詩曰達人輕祿位居處  
傍林泉洗硯魚吞墨烹茶鶴避煙閒惟歌聖代老不恨  
流年靜想閒來者還應我最偏 王禹偁酬种放徵君  
詩曰男兒旣束髮出處路岐各苟非秉陶釣即去持矛  
槊致主比唐虞安邊如衛霍不爾爲逸人深居反吾樸  
胡然自碌碌名節亦銷鑠 又謫居感事詩曰孤寒明  
主信清直上天知消息還依道生涯只在詩 又遣興  
詩曰百年身世片時間況是多愁鬢蚤班貧有琴書聊  
自樂貴無功業未如閒波平南浦堪垂釣日滿東窓尚



掩關祇為慈親憶歸去商山不隱隱何山 韓琦後園  
閒步詩曰池圃足高趣公餘事少關幽禽聲自樂流水  
意長閒近竹花終俗過欄草費芟心休誰似我官府有  
青山 蘇舜欽離京後作詩曰春風柰別何一棹逐驚  
波去國丹心折流年白髮多脫身離網罟含笑入煙蘿  
窮達皆常事難忘對酒歌 張詠幽居詩曰落花時節  
掩關初請絕江城舊酒徒滿屋煙霞春睡足一谿風雨  
夜燈孤易中有象無消息身外無求免歎吁多謝巖僧  
頻見訪欲迴流水又踟躕 梅堯臣閒居詩曰讀易忘  
飢倦東窓盡日開庭花昏自斂野蝶晝還來謾數過籬

笋遙窺隔葉梅惟愁車馬入門外起塵埃 歐陽修書  
懷詩曰齒牙零落鬢毛疎潁水多年已結廬解組便為  
閒處士新花莫笑病尚書青山仕至千鍾祿白首歸乘  
一鹿車況有西鄰隱君子輕蓑短笠伴犁鉏 林逋湖  
山小隱詩曰衡門臨晚鳥環堵背寒岡片月通蘿徑幽  
雲在石牀客遊拋鄩杜漁事擬滄浪管樂非吾尚昂頭  
肯自方 孔平仲和朱君況卜居詩曰吾身當老此園  
中世路崎嶇幾萬重且飽稻梁隨雁鶩盡將雲雨付蛟  
龍求賢有志終須得招隱何人肯見從且為莆田朱處  
士比鄰先種七株松 王安石寄曾子固詩曰斗粟猶

人部

尚書類傳卷三百四

言志



慙報禮輕敢嗟吾道獨難行脫身負米將求志戮力乘  
田豈為名高論幾為衰俗廢壯懷難值故人傾荒城回  
首山川隔更覺秋風白髮生 陳師道次屬沈東老詩  
曰隨世功名非所望稱家豐儉不求餘青山出指論奇  
事白髮挑燈寫細書 又絕句曰書當快意讀易盡客  
有可人期不來世事相違每如此好懷百歲幾回開  
又和沈世卿推官見寄詩曰倦看世態久低徊且置窮  
通近酒杯未忍一身閒處著暫容雙眼醉時開為呼阿  
武扶頭起擬與山公倒載回好在東籬舊時菊無心準  
擬白衣來 黃庭堅次韻荅柳通叟求田問舍之詩曰

少日心期轉繆悠蛾眉見妒且障羞但令有婦如康子  
安用生兒似仲謀橫笛牛羊歸晚徑卷簾瓜芋熟西疇  
功名可致猶回首何況功名不可求 蘇軾和人見贈  
詩曰只寫東坡不著名此身已是一長亭壯心無復春  
流起衰鬢從交病葉零知有雪兒供筆硯應嗤竈婦洗  
盆瓶回來索酒公應厭京口新傳作客經 又和歸田  
園居詩曰環州多白水際海皆蒼山以彼無盡景寓我  
有限年東家著孔丘西家著顏淵市為不二價農為不  
爭田周公與管蔡恨不茹三間我飽一飯足蕨薇補食  
前門生餽新米救我厨無煙斗酒與隻雞酣歌餞華顛



禽魚豈知道我適物自閒悠悠何必爾聊樂我所然  
鄭俠次韻知郡登高言懷詩曰莫向天涯說故鄉人身  
不似雁隨陽黃花滿手空佳節千里有懷如寸腸為許  
功名酬聖代不須愁緒付瑤觴男兒不是閨中物生則  
桑弧射四方 王令雜詩曰方春不種蘭終歲無自佩  
良田弗加芟徒穉亦無歲空令雨露恩日夕被蒿艾安  
坐飢怨天此理果誰在 又書懷寄黃任道滿子權詩  
曰伊余有遐致久此困俗械嘗思擺絕去自放出世外  
高懷樂天寬遠目斥人礙有田足晨昏有圃具菹菜父  
母不待養妻子固易賴世孰得丘山亦孰失蒂芥人自

能輕重吾將守所愛六經老誠明萬古孰成敗得時為  
醯鹽滋味和鼎鼐失猶有萬世令名自沽賣自視久已  
明淩不俟謀蔡寄詩侑子觴期子和而再 張耒有感  
詩曰南風霏霏麥花落豆田漠漠初垂角山邊夜半一  
犁雨田父高歌待收穫雨多蕭蕭蠶簇寒蠶婦低眉憂  
繭單人生多求復多怨天工供爾良獨難 又夏日雜  
感詩曰我本與世疎少慵老成頑何為不引去坎軻行  
所難 韓駒元符戊寅與無斃弟卜居縣城東述情詩  
曰四海一居何處卜北窓祇取見家山要無名利來心  
曲便有園林出世間拙宦莫與三黜歎老歸未厭百年



閒先君餘慶期之子吾駕如今不可還 秦觀春日雜  
興詩曰潭潭故邑井猗猗上宮蘭不食自清潔莫服更  
幽閒志士恥弱植卷迹甘飢寒佳辰追良覲觸物懸悲  
端川途眇回遠經歲曠音翰豈不慕裘馬詭得非所安  
蟬冕多怵迫繩樞渺憂患枉尋竟何補方枘誠獨難  
又海康書事詩曰培塿無松柏駕言出焉遊讀書與意  
會却歸可忘憂尺蠖以時詘其信亦非求得歸良不惡  
未歸且淹留 沈與求秋日閒居詩曰茅屋秋風斗破  
除蕭騷渾似浣溪居青山侍坐從吾好黃帽籠頭與俗  
疎賴有園官能送菜可無溪友解留魚從今輒莫慚枵

腹一飽須煩插架書 陳與義寄若拙弟兼呈二家叔  
詩曰退之送窮窮不去樂天待富富不來政須青山映  
墨髮顧著皂蓋爭黃埃何如父子共一壑龐家活計良  
不惡阿奴況自不碌碌白鷗之盟可同諾 又述懷呈  
十七家叔詩曰兒時學道逃悲歡只今未免有飢寒淨  
生萬事蟻旋磨冷官十年魚上竿君不見古人有待良  
不多利名溺人甚風波垂露成幃仲長統明月為燭張  
志和 又散髮詩曰百年如寄亦何為散髮清狂未足  
非南澗題詩風滿面東橋行藥露霑衣松花照夏山無  
暑桂樹留人吾豈歸藜杖不當軒蓋用穩扶居士莫相

人部

洪金英詩卷三百四

言志



違 李覲寄懷詩曰根生但為松翼飛但為鳳王侯尚  
可輕道義本來重 王炎荅黃一翁詩曰知余頗清苦  
應物未圓熟遊宦不能巧俯首立矮屋鍛鍊知精金祁  
寒見松竹自立不堅定庸行徒聖讀誰謂漆園高俯首  
欲丐粟窮作扣角歌老厭淄川牧古道寢斷喪時人方  
逐逐有田南山南可辨一盂粥請賡歸去來世路早收  
足 唐康直舍書懷詩曰寸枉非吾志休論尺與尋黃  
披終日卷青對十年衿 張元幹漫興詩曰老荅書題  
蠲貧營口腹忙未能忘壯志遽肯變剛腸晷短催寒急  
燈明伴漏長牀頭褚衾在不怕滿簷霜 葉夢得庚午

正月七日自詠詩曰余性寡所諧平生惟自得談名頸  
深縮論利面作赤文不貴雕蟲詩尤惡鉤摘粗豪真所  
畏機巧非予匹所以常閉門千載求知識黃卷有可人  
為之忘寢食亦復愛山水策杖無與適看雲獨忘歸聽  
泉常永日內樂萬事休中虛衆妙入欲以語斯人此事  
吾無力道喪亦久矣無言三歎息 又會稽旅舍言懷  
詩曰北山之北寄柴扉茅屋參差倚翠微老罷那知還  
作客春來無柰苦思歸淹留恐復荒三逕潦倒寧堪扈  
六飛乘雁雙鳧成底事不應容易裂荷衣 又和白樂  
天寫懷仍效其體詩曰莫把著龜更問天向來心事已



蕭然塵中恟况常如失夢裏呻吟半不眠三徑松筠終  
問舍五湖煙水不須錢艾者相去能多少早擬懸車十  
五年 朱熹述懷詩曰夙尚本林壑灌園無寸資始懷  
經濟策復愧軒裳姿效官刀筆間朱墨手所持謂言殫  
蹇劣詎敢論居卑任小才亦短抱念一無施撫已實已  
優於道豈所期終當反初服高揖與世辭 又卜居詩  
曰卜居屏山下俯仰三十秋終然邨墟迴未愜心期幽  
近聞西山西深谷開平疇茅茨十數家清川可行舟風  
俗頗淳樸曠土非難求誓捐三徑資往遂一壑謀伐木  
南山顛結廬北山頭耕田東溪岸濯足西溪流匆來即

共歡客去成孤遊靜有山水樂而無身世憂著書俟來  
哲補過希前修茲焉畢暮景何必營菟裘 陸游西邨  
醉歸詩曰俠氣崢嶸蓋九州一生常恥爲身謀酒寧剩  
欠尋常債劍不虛施細碎讐岐路凋零白羽箭風霜破  
弊黑貂裘陽狂自是英豪事邨市歸來醉跨牛 又自  
述詩曰早畏危機避巧丸長安未到意先闌心如老馬  
雖知路身似鳴蛙不屬官閒駕柴車無近遠旋沽邨酒  
半甜酸羣兒何足勞情怒胸次從初抵海寬 陳傅良  
月夜書懷詩曰道德吾何敢功名代有人倉黃恒畏咎  
班白總憂貧細字書全廢深杯酒勿親靜言空自愛萬



古亦泯泯 楊萬里雲臥菴詩曰十年兩袖軟紅塵歸

濯滄浪且幅巾不是白雲留我住我留雲住臥閒身

薛季宣鄉思詩曰達仕租千石虛名酒五經豈能千日

醉未勝九年耕識取杯中趣知從袋裏乘讀書無一事

官宦汨平生 樓鑰酒邊戲作詩曰末年六十已言歸

七十重來自覺癡未報君恩歸未許尊前羞聽摸魚兒

劉克莊野性詩曰野性無羈束人間毀譽輕客言詩

惹謗妻諫酒傷生窓納鄰峯碧瓢分遠澗清近來猶少

睡打坐到鐘聲 又示兒詩曰瓜芋邨邊一畝宮閉門

不復問窮通生羞奏技伶人裏死怕標名狎客中講學

有誰明太極吟詩無路和薰風身今老矣空追悔但祝

吾兒勿似翁 又示同志詩曰滿身秋月滿襟風敢歎

栖遲一壑中除目解令丹竈壞詔書能使草堂空豈無

高士招難出曾有先賢隱不終說與同袍二三子下山

未可太匆匆 劉宰得軒即事詩曰上印還家不計年

水光彌望木參天綠雲洞裏開書幌紅錦波心漾酒船

王阮和貧士詩曰吾聞戴安道不對王侯琴當時豈

不能低着求賞音一曲朝得聞千金夕得尋舍之不肯

顧輕重得所斟小人一時快君子百世欽貧士繫此辨

士乎當正心 戴復古感遇詩曰采薇人固高飲露蟬

人部

游鍾類卷三百四

言志

三



遂清謀茲一粒粟舉世共營營營亦多塗中有虧與  
 盈陋巷一簞食朱門九鼎烹窮達各有命繫誰主權衡  
 吾生未可必秋風白髮生 鄭震歸去詩曰歸去豈不  
 好平田帶淺林春猿鳴雪澗晴日轉雲岑世久無鳴犢  
 時當學展禽吾生今老矣梁甫豈能吟 文天祥涉世  
 詩曰涉世如溪谷只宜在淺處一生如一日未暮早歸  
 去君不見偉哉男子韓淮陰往往正坐涉世深功成身  
 退豈不好當時何事歸不早人生少年須立事生我不  
 應負天地了却君王事便休去時莫待雨淋頭 林景  
 熙述懷次柴主簿詩曰獨閉柴門木石親詩筒剝啄不

妨頻青燈風雨多離夢白髮江湖少故人謾讀楚騷招  
 太乙誰聽郢曲和陽春書香劍氣俱寥落虛老乾坤父  
 母身 真山民幽興詩曰不賦千鍾賦一簞天公有意  
 養癡頑書猶能看未曾老詩亦莫吟方是閒寬著庭除  
 貪貯月少栽竹樹要觀山空階兩日無行迹又上苔花  
 幾點斑 元虞集八月八日有感題視草堂壁曰載筆  
 趨雲閣探囊索縵袍坐銷秋日淨心折夜風高識字頭  
 先白謀生計轉勞文園多病渴常想賜蒲萄 薩都刺  
 無題詩曰為客三年海上洲故鄉何處瘴雲稠數千里  
 外蠻人域十八灘頭過客舟時有山禽呼姓字或從烏

人部



鬼作芻儔故人珂珮周旋處紫殿清風十二樓 貢奎  
即事詩曰藹藹羣樹林孤雲莫來歸紛紛飛鳥倦斂翮  
相因依臨軒方獨坐涼飈吹我衣物理固有常悠然悟  
其機山中何者樂躬耕自無飢百年事未晚寧勞歌昨  
非歸歟友田父一尊聊可揮 又集雲從山詩曰適意  
豈不樂營營竟何為虛談非世具勿遣俗士知素衷慕  
幽蹈終焉謝塵羈 郭奎紀夢詩曰忽忽顏芳年搖搖  
寄行役寢興勞形神鬢髮元已白驚風響庭樹憂思日  
常積夢魂清夜歸髣髴舊鄉邑青松在園田桑柘蔭廬  
室飛鳥雲際還牛羊下來夕澄湖淡微波秋山有佳色

雞犬雜比鄰墟煙藹阡陌怡怡兄弟情淒淒丘隴側伐  
木逢行歌僕夫候馬立臨流濯長纓挂冠坐磐石似慰  
平生歡覺來異疇昔百年如轉蓬萬物仍遺舄天命良  
在茲勿復云得失 周權幽居詩曰索居簡人事與世  
意空投柴荆已就理歲功念西疇落落雞犬墟隱隱漁  
樵洲歉傲一壺祿聊復寫我憂及辰遇沖賞獨策還經  
丘向夕山景霽延矚明川流白雲息空谷歸鳥鳴林幽  
人生亦委化汲汲將焉求 又山中雲詩曰空山有白  
雲雅與高人約卷舒本何心乃似悅遐矚色幽澹山翠  
意遠度溪綠日莫久徘徊前邨雨應落 傅與礪雜詩



曰夭夭園中桃鬱鬱松上枝春陽發新榮貞脆誰能知  
一朝繁霜墮百卉各已萎青青乃自保不為時所移向  
非厄歲寒何以別奇姿 揭傒斯寄題馮掾東臯園亭  
詩曰理達自知簡情忘可避喧庶云保貞和歲莫委周  
旋 又雜詩曰青青孤生松高出浮雲中下有嘉樹林  
上有萬里風俯視原上草秀色何丰茸自顧豈不高獨  
立難為容常恐本根蠹委此萬與蓬 何中松野即事  
曰山窓一叢蕙脩葉吐紫蕤或云斷續花我亦豈敢疑  
楚澤多芳草真偽奚難知浮俗尊虛名君子傷令姿博  
觀貴自得清芬良在茲 又病中感懷詩曰多病他鄉

外孤懷始覺愁山圍雙鷺曉門閉一蟬秋遇合馮生鉞  
勲名季子裘悠悠耦耕者端暇為人謀 許謙採藥詩  
曰亭亭北山松宿靄蔭深碧蒼根走虬龍巨榦盤鐵石  
平生棟梁具不受霜雪厄兔絲得所附裊裊掛千尺流  
脂入九地千歲化琥珀我欲掇其英俯仰費搜摘紅爐  
轉丹砂石髓變金液但恐茫昧間圖驥不可索意長時  
苦促雙鬢日夜白刀圭或可試習習在兩腋蓬萊三萬  
里詎謂弱水隔他時來山中故老應不識 楊奐未歸  
詩曰渭水遙通洛函關近隔秦百年垂老日千里未歸  
身夢寐嫌為客妻孥不諱貧一官無可戀花氣五陵春



倪瓚池蓮詠曰迴翔波間風的歷葉上露清池結素  
彩華月映微步雲陰花房斂雨歇芳氣度欲去拾明璫  
踟躕惜遲莫 劉永之楊弘中藥室詩曰秉志慕沖澹  
息迹在丘園閒庭徧芳草高窓見遠山采苓陟松逕煮  
朮散榆煙董生垂徃躅嵇子有遺編神宇謝氛濁天倪  
諒斯全惟當振塵服與子共清言 黃潛秋懷詩曰風  
雨仍搖落江山且滯留懶從生事拙閒惜壯心休弱蔓  
縈欹石空槎臥狀流興懷到微物世故劇悠悠 成廷  
珪欲卜居海上未有定止先作寄紫步劉子彬詩曰滿  
目風塵祇自憐輕裝已辦有行纏也知避亂依城郭更

欲移家傍渚田紫步於今無士馬滄溟何處有神仙桃  
源只在人間世還許漁郎放釣船 戴良和淵明飲酒  
詩曰我如北塞駒困此東南道有力不獲騁長鳴至於  
老苒苒陰陽移萬物遞榮槁既無騰化術此身豈長好  
一朝委運徃恐遂失吾寶何當攜麴生縱浪遊八表  
又田居詩曰我生非匏瓜於世可無食躬耕實所慕戮  
力歸稼穡當春土脈動農事滿阡陌晨興負耒去日入  
弗遑息我苗今已長我耕有餘隙斗酒勞近鄰隻雞餉  
過客人生但如是亦足慰平昔此意誰復知千載惟沮  
溺 又荅李寧之詩曰涸鱗思赴海倦翮念歸山何如



遠遊客歲久不知還 又除夜客中詩曰已就長途往  
堪憐莫景斜一年惟此夜千里更誰家戀關心空赤憂  
時髮已華此身如可乞只合老煙霞 黃鎮成題紫雲  
山居詩曰樹老秋仍露山空晚更蟬雨添春藥水雲濕  
種瓜田對榻僧長坐聞鐘客未眠自應麋鹿性疎散愛  
林泉 徐天倪擬古詩曰娉婷閨中女天質知自愛空  
懷蘋藻心日月苦行邁蹇脩意良勤遲遲如有待未嫁  
庸何傷失良將重悔 明劉基感懷詩曰我有綠綺琴  
其材出空桑金徽映土軫音韻鏘琳瑯上弦感薰風下  
弦來鳳凰世耳不欲聞子期今則亡願持獻重華路阻

川無梁 孫一元卜居詩曰石上藤蘿對夕曛解衣長  
日坐來頻挽回滄海真無計領略青山合有人養鶴似  
嫌雙口累為魚又過一生身相逢惟是南屏老獨樹柴  
門許結鄰 又幽居詩曰自得窮通理幽居不誤身清  
流梳石髮遠霧著山中竹上僧留偈庭前鶴近人科頭  
終日坐吾亦愛吾真 章表九月晦日感懷詩曰長歎  
拂吳鉤南圖惜壯遊乾坤同逆旅風雨忽窮秋牢落莊  
周劍飄飄范蠡舟行藏吾敢必天意信悠悠 高叔嗣  
再調考功詩曰引疾三上書微願不克諧徒官復在茲  
心迹一何乖軒裳日待旦閭闔凌雲排入屬金馬籍出



與羣龍偕積賤詎有基履榮誠無階但惜平生節逾久  
浸沈埋既妨來者途誰明去矣懷鳥迷思故林水落存  
舊涯惟當尋素業歸臥守荆柴 王世貞早起書懷詩  
曰晨雞四鳴號天地猶未白仰觀衆星低歷歷如可摘  
邈來浩無端數往已為迹言念乘軺始徂歲三代易謬  
以理解資而當隴髀役何悟繭絲辰膺此保障責桑計  
非所工商刑焉能擇稍清萑苻澤未媿萊蕪室蒿目中  
竟乖蓬心逝安適久且類羝藩猶豫托雞肋疇當憐畏  
途為我一察識 梁有譽詠懷詩曰明月鑒重幃涼風  
吹綺疏佳人揚清謳顧影傷離居昔別黃鶴鳴倏忽秋

蘭舒繁華不再至歡樂寧清餘迢迢牽牛星萬古恆不  
渝所思杳天末日夕增煩吁秦女善鳴箏趙女亦吹竽  
箏竽豈不哀不如琴瑟娛織縑常苦遲織素常苦劬嗟  
哉織作勤淚下霑羅襦 吳國倫述志詩曰皇矣太初  
闢清濁開鴻蒙人生貴且靈受此天地中四序若鱗次  
陳迹藐易窮豈伊一抔土掩此七尺躬沒世名不稱宣  
尼志所恫寸陰逝足惜禹德彌以崇抗志慕先民謇子  
亶不聰大猷廣且穆惟彼能者從努力戒前路艱哉一  
簣功庶幾耿耿微可以令厥終 又曰黃鵠臨當飛徘徊  
視其翮一舉橫四海須臾萬里隔烏鳶集林莽俯啄



仰相嚇營營濁世儒所志在干澤處膏但自潤何辭服  
轅軛美哉寥廓士遠遊無遺迹一羽輕侯封九鼎重人  
國遇合鮮常期飄飄從所適 盧枏雜詩曰高樓有佳  
婦窈窕青雲端左蔭綠桂枝右紉芳澤蘭臨流戲珠浦  
拾翠游芝田蛾眉衆所妬時俗尚無鹽捐葉蓬蒿中誰  
來希令顏徘徊歲云暮拂衣聊長歎 王世懋謝病言  
懷詩曰中年無宦志觸事思解除偶與象罔諧不為求  
元珠三事我大夫申申詈其迂感君意良苦賤子倦為  
儒頑石受銅丸丸轉石自如人生大塊間安得等賢愚  
賢者誠自賢高足策天衢愚者誠自愚寂寞終殘軀

高啓行路難詩曰君不見盤中鯉暫失風濤登俎几君  
不見枝上蜩纔出糞壤凌雲霄推移變化詎可測勿謂  
明日同今朝出乘高車入大馬半是當年徒步者范叔  
曾逃客溺餘衛青亦在人笞下悠悠行路莫相欺為雌  
為雄未可知 許廷慎商隱詩曰無心成避世有迹類  
遊仙自入煙霞窟悠悠不計年

淵鑑類函卷三百四



游錄類卷三百四

山自入野實然然不信早

游錄類卷三百四

游錄類卷三百四

游錄類卷三百四

游錄類卷三百四

游錄類卷三百四



